



K1 tasol

K40,000 Win Moni

wanwan long 4pla
laki lain bai winim
K10,000
Sekim hau long joinim
resis insait long ol
stoa mipla makim



Politisen no ken kamap Manam Atoriti siaman

OL lida bilong Madang Provins i les long Memba bilong Bogia i kamap siaman bilong Manam Resettlement Authority (MRA).

Gavana bilong Madang, Jim Kas, i mekim dispela strongpela toktok long Palamen asde taim Deputi Praim Minista na Inta Gavman

Rilesens Minista, Leo Dion, i tokaut long tupela nupela senis gavman i mekim long Manam Resettlement Authority Act 2015.

Dispela nupela lo bai stretim sindaun bilong ol manmeri Manam, husat i nau stap yet long ol tripela kea senta long Mangem, Sumkar

distrik, Potsdam, Bogia distrik, na Asuramba, Bogia distrik long yia 2005 i kam inap nau.

Namba wan senis i kamap long Seksen 9 Sabseksen (1) bilong dispela lo taim nesenel gavman i senisim het toktok o nem bilong dispela Manam Resettlement Au-

thority i go long 'Manam and Boisa Rehabilitation and Resettlement Authority.'

Namba tu senis i kamap long Seksen 9 Sabseksen (1) bilong dispela lo we em i tok long ol bod memba bilong dispela atoriti.

Dispela nupela senis gavman i mekim long Seksen 9 Sabseksen (1) i lukim Memba bilong Bogia o Bogia Distrik Dvelopmen Atoriti bai kamap siaman bilong MRA.

Tasol Mista Kas i tokim Palamen osem ol politisen i no ken kamap siaman bilong kain atoriti osem.

"Ol politisen i no ken kamap bos bilong dispela Manam Resetelmen Atoriti. Dispela senis i no bin kisim tok orait long Madang provinsal eksekutiv kaunsil na ol pipel bilong Madang na Manam.

"Mi no gat wanpela bel hevi wantaim nau Memba bilong Bogia, tasol mipela i les long ol memba na politisen i kamap siaman o bos bilong dispela atoriti," Mista Kas i tok.

Em i tok gavman i mas rausim dispela senis na larim pastaim lo i stap bikos 'dispela nupela lo i no bin kisim blesing bilong Madang

provinsal gavman' na ol pipel bilong Manam.

Tupela Memba bilong Midel Ramu, Tommy Tomscoll, na Memba bilong Usino-Bundi, Anthon Yagama, i no bin wanbel tu long dispela tupela senis, na tupela i sapatim Gavana Kas.

Ol tripela lida i tok Nesenel Gavman inap long kisim tingting bilong pipel long Manam, na tu askim Madang Provinsal Gavman sapos ol i wanbel long larim Memba bilong Bogia, husat i siaman bilong Bogia Distrik Dvelopmen Atoriti, i kamap siaman bilong nupela Manam Reseteleln Atoriti.

Mista Tomscoll i tok 'yumi i no ken toktok long politisaisim' dispela atoriti bikos dispela kain pasin bai no inap larim mani i stap gut long stretim sindaun bilong ol manmeri.

Mista Yagama i salensim nesenel gavman long 'bihainim sistem' stret na kamapim dispela tupela nupela senis.

**Moa stori long
Manam long pes 2**

Ol bois bilong banis tanim bel...



TANIM BEL: Ol kalabus lain long Bomana i karim Diwai Kros na wokabout long rot long Mosbi. Planti bilong ol i tanim bel na kamap lotu man taim ol stap insait long banis kalabus. Ol i kam bung wantaim planti Kristen manmeri na pikinini long Gut Fraide na karim Diwai Kros long Tokarara na go inap long Don Bosco Teknikol Institut long Is Boroko. *Poto Nicky Bernard.*

Insait:



Sentral Benk laik kisim dinau mani long IFC

PRAIM Minista Peter O'Neill i tokim Palamen olsem Benk ov PNG (Sentral Benk) i tingting long kisim US\$ 250 milien (K780m) dinau mani long International Finance Corporation (IFC), na i no long International Monetary Fund (IMF) long stretim hevi bilong foren eksens bilong PNG i wok long sot.

Mista O'Neill i tok Sentral Benk i wok long toktok wantaim IFC na World Bank long kisim K780 milien.

IFC bai salim dispela mani i kam long PNG long ol komesel benk. Dispela mani bai helpim Sentral Benk i gat moa



Praim Minista Peter O'Neill

Ameriken dola, we ol kampani i nidim long baim ol samting long ovasis na kisim i kam insait long PNG.

Sentral Benk bai kisim dispela mani na salim i go gen long ol tripela komesel benk long PNG, Bank South Pacific (BSP), Westpac na ANZ.

Mista O'Neill i tok BSP i wanbel long larim Sentral Benk i salim dispela mani i kam insait long akaun bilong ol.

"BSP i wanbel pinis long kamapim dispela tasol narapela tupela benk i no wanbel. Mipela i wok long toktok yet wantaim tupela benk, ANZ na Westpac.

"Taim ol dispela tripela benk i wanbel, IFC bai salim dispela mani i kam insait na helpim Sentral Benk long daunim dispela hevi bilong foren karensi i sot long PNG," Mista O'Neill i tok.

Mista O'Neill i autim dispela toktok long Palamen las wik taim Memba bilong Goroka, Bire Kimisopa, i askim em long tokaut stret long olsem wanem gavman i wok long stretim hevi bilong foren eksens long kantri.

Mista Kimisopa i tok ol kampani bilong PNG i nidim K3 bilien foren karensi o mani bilong arapela kantri long mekim bisnis gavman i mas mekim sampela

samting long helpim ol kampani bilong PNG long stretim dispela hevi.

"Mi sindaun na toktok pinis wantaim CEO bilong BSP (Robin Fleming) na em i wanbel pinis long dispela.

"Em i tok tu olsem ol i stretim pinis sampela hevi bilong ol kampani nidim foren karensi tasol ol i no stretim yet 4-pela bikpela kampani.

"Sentral Benk i tok save pinis long mipela olsem ol i toktok pinis wantaim IFC long kisim dispela mani kam insait na helpim ol kampani na bisnis," Mista O'Neill i tok.

Putim Manam pipel i go pas

PRAIM Minista Peter O'Neill i les long ol memba bilong Madang i kros na bel hevi i stap namel long ol yet taim ol i laik stretim toktok long sait bilong manmeri Manam husat i stap nau long ol kea senta long yia 2005 i kam inap nau.

Mista O'Neill i mekim dispela toktok asde long Palamen taim tripela memba bilong Madang i no bin wanbel long tupela senis nesenel gavman i bin mekim long Seksen 3 Sabseksen (1) na Seksen 9 Sabseksen (1) bilong Manam Resettlement Authority Bill 2015.

Dispela lo i laik helpim ol manmeri bilong Manam Ailan, husat i lusim ples bikos long volkeno i kamap

na bagarapim ples, long painim sampela gutpela hap na sindaunim ol long larim ol i gat gutpela laip na stap gut aninit long Madang provinsal gavman na Nesenel Gavman.

Mista O'Neill i tokim ol lida bilong Madang long putim laik na intres bilong ol manmeri Manam i go pas long olgeta samting ol i mekim long sait bilong dispela resetelmen program.

"Dispela em i namba tu taim dispela kain toktok i kamap. Tasol i rispekim ol toktok bilong ol lida bilong yumi long Madang.

"Yumi mas putim ol politikel difrens bilong yumi arasait na putim intres bilong manmeri Manam i go pas. Yumi mas sanap wantaim na mekim sampela

gutpela samting long ol pipel bilong yumi.

"Yumi no ken larim ol i stap yet long ol kea senta olsem," Mista O'Neill i tok.

Em i mekim dispela toktok bihain long Madang Gavana Jim Kas wantaim Memba bilong Usinobundi, Anthon Yagama, na Memba bilong Middle Ramu, Tommy Tomscoll, i bin toktok egensim dispela tupela senis i kamap long dispela lo.

Gavana Kas i laikim Palamen long sapotim em long rausim dispela tupela nupela senis, na larim olupela lo i stap.

Em i tok ol pipel bilong Manam na Madang Provinsal Gavman i mas givim tok orait long Nesenel Gavman long mekim dispela senis.

Yagama: Yumi mas bihainim sistem

YUMI ol lida mas bihainim ol sistem na lo, wankain olsem yumi mekim ol lo na yumi laikim ol pipel long bihainim ol lo na sistem yumi yet i kamapim.

Memba bilong Usinobundi, Anthon Yagama, i autim dispela toktok asde long Palamen taim em i skelim olsem gavman i no bin bihainim stret ol sistem long mekim nupela lo na senisim olupela lo taim ol toktok long mekim sampela senis na kamapim nupela lo gen long kirapim Manam Resettlement Authority Bill 2015.

Gavman i kamapim dispela lo long stretim sindaun bilong ol manmeri Manam, husat nau i stap yet long ol kea senta bihain long bikpela volkeno i bin bagarapim ples na kamapim birua long laip bilong ol.



Jim Kas

Mista Yagama i tok nesenel gavman i nol bihainim stret sistem bilong mekim ol senisim lo bikos ol i no bin kisim tingting bilong ol pipel long Manam, na tu ol i no bin askim Madang Provinsal gavman taim ol i mekim dispela senis.

"Dispela senis i no kam long Madang. Yumi no ken larim dispela senis bilong ol

i kamap. Ol pipel long ples i mas wanbel na tok orait.

"Provinsal gavman tu i mas save long wanem samting i kamap. Dispela lo i no kam long Madang bikos provinsal gavman i no save long wanem samting i kamap.

"Ol lida i mas bihainim sistem na i no ken senisim lo o kamapim nupela lo long laik bilong ol yet. Ol pipel i mas autim tingting bilong ol. Ol lida bilong provins i mas save pastaim long wanem samting i stap insait long dispela lo.

"Mi no bilong Manam tasol mi lida bilong Madang na mi lukim olsem samting i no kamap stret long dispela nupela senis gavman i mekim. Dispela senis i mas raus, Palamen i no ken vot long larim dispela senis i kamap," Mista Yagama i tok.

Nupela SME lo bai kamap

OL wok i kamap pinis long larim PNG i gat nupela lo long kirapim ol liklik bisnis o SME, Tred, Komes na na Indastri Minista, Richard Maru, i tok.

Minista Maru i tok dispela nupela lo bai redi long Palamen long dispela yia bihain long Ateni Jeneral Ano Pala i givim tok orait long wanpela lo kampani long raitim dispela lo.

"Dispela lo inap long kamap long taim pinis. Tasol nau mi amamas olsem gavman bilong yumi i givim tok orait long larim dispela lo i kamap.

"Mi bai kisim dispela bil i go long palamen long bihain taim long dispela yia," Mista Maru i tok.



Richard Maru

Namba tu riding bilong sivil aviesen bil

SIVIL Aviesen Amendmen Bil 2015 i lukim namba tu riding bilong em i kamap long Palamen long Tunde dispela wik.

Minista bilong Sivil Aviesen, Davis Steven, i tok dispela lo em i wanpela namba wan lo we gavman i kamapim long larim ol ples balus na sefti bilong manmeri taim ol i yusim balus i stap

gut oltaim long kantri bilong yumi.

Em i tok taim Palamen i passim dispela bil, em bai kamap olsem lo long lukautim ol ran bilong balus, sefti bilong ples balus na manmeri o pasindia husat i yusim balus na ples balus long ran i go i kam long narapela ples.

"Taim dispela bil i kamap

lo, em bai helpim sivil aviesen sistem long kantri bilong yumi long kamap nupela na senis long bihainim wankain standat olsem long narapela ol bikpela develop kantri," Mista Steven i tok.

Em i tok dispela bil i putim ol sampela nupela samting we ol intenesenel bodi bilong aviesen i laikim long en.

Juffa wari long ol Oro ples balus

ORO Gavana Gary Juffa i tok em i wari long ol ples balus long provins bilong em i no stap gut.

Mista Juffa i mekim dispela toktok long Palamen long dispela wik Tunde bihain long em i skelim olsem 5-pela ples balus long provins bilong em i pas, na i no moa wok.

"4-ples balus tasol i stap. 5-pela i pas pinis na i no moa operet," Mista Juffa i tok.

Em i tok gavman i no ken larim ol kampani i kamapim lou kwaliti wok o wok i no gutpela na bai bagarap hariap, sapos ol i laik kirapim nupela ples balus long PNG.

Em i mekim dispela toktok

taim Sivil Aviesen Minista, Davis Steven, i ridim namba tu taim dispela bil bilong Sivil A v i e s e n Amendmen Bill 2015.

"Yumi mas putim sefti bilong ol balus na manmeri bilong yumi i go pas. Dispela em i namba wan samting.

"Gavman i mas makim ol gutpela kontrakta long



ORO Gavana Gary Juffa

mekim mentenens o kirapim nupela ples balus," Mista Juffa i tok.

O'Neill: Yumi gat inap pawa saplai

PNG Power Limited (PPL) i kamapim bikipela pawa saplai long inapim Pot Mosbi na Lae, Praim Minista Peter O'Neill i tok.

Tasol pasin nogut bilong sampela ol wok manmeri long katim pawa i save kamapim bikipela blekaut long Pot Mosbi na Lae siti.

Mista O'Neill i belat na mekim dispela toktok bihain long em i luksave nau olsem sampela ol wok manmeri bilong PPL yet, husat i memba bilong PNG Eneji Wekas Yunion, i wok long katim pawa saplai na kamapim blekaut long dispela tupela politikel na ikonomik kapital siti bilong PNG.

"Long Pot Mosbi, yumi gat 25 mega wat (MW) moa pawa saplai i kam long PNG LNG Pawa plant, na mipela bai konektim 50MW moa long bihain taim.

"Dispela bai givim mipela inap pawa saplai long bungim ol nid bilong pawa ol manmeri na bisnis haus bai gat long narapela 10 o 15 yia moa," Mista O'Neill i tok.

Mista O'Neill i tok dispela bai givim inap pawa saplai long Pot Mosbi. Tasol em i tokaut tu olsem planti ol samting bilong kamapim na karim pawa i nidim mentenens long Pot Mosbi na Lae.

"Mipela i save olsem ol samting bilong PPL i nidim bikipela mentenens wok. Maski gavman i bin helpim PPL wantaim bikipela mani long kirapim ol mentenens wok, PPL i nidim moa mentensens wok long larim ol samting i stap gut na no gat wanpela pawa saplai sistem i bruk daun.

"Dispela em i wanpela bikipela asua i stap nau long PPL bikos ol samting bilong kamapim pawa na karim pawa i wok long bagarap na pundaun kam daun isi isi," Mista O'Neill i tok.

Em i tok wanpela as bilong kamapim pawa blekaut em bikos ol samting bilong karim pawa olsem pawa pol na pawa lain o ol transfoma i olpela na i save bruk daun sampela taim na kamapim blekaut.

Tasol long sait long pawa saplai, Mista O'Neill i tok Lae na Pot Mosbi siti nau i wok long kisim inap pawa saplai long inapim olgeta haus na faktori.

"Ol manmeri long Pot Mosbi na Lae i mas save olsem gavman i les long ol wan wan wok manmeri bilong PPL i kamapim hevi long laip na bisnis bilong mipela," em i tok.

"PPL i abrasim mak bilong pawa saplai ol manmeri long Lae na Pot Mosbi i nidim, na em i kamapim moa pawa long larim ol bisnis i ran gut na manmeri i yusim pawa long mekim laip i go isi," Mista O'Neill i tok.

O'Neill givim tok lukaut long PPL wokman

PRAIM Minista Peter O'Neill i givim strongpela tok lukaut long ol wok manmeri bilong PNG Power Ltd (PPL) long no ken stopim pawa long Lae na Pot Mosbi.

Mista O'Neill i givim dispela tok lukaut taim em i harim olsem sampela ol PPL wok manmeri husat i stap long menesmen na yunion i wok long katim pawa na larim ol manmeri i stap long tudak.

Mista O'Neill i tok dispela rabis pasin bilong katim pawa long Lae na Pot Mosbi i no ken kamap moa bikos i gat wanpela lo i stap long sasim ol manmeri husat i mekim kain pasin olsem.

"PPL i kamapim inap pawa saplai long inapim saplai bilong Pot Mosbi na Lae."

Mista O'Neill i tok Lae na Pot Mosbi i kisim inap pawa saplai tasol sampela ol wok manmeri long menesmen na yunion i wok long mekim dispela kain pasin nogut.

"Menesmen bilong PPL na eneji wokus yunion i gat sik bilong ol yet i stap.

Dispela i lukim sampela memba bilong yunion i wok long katim pawa long Lae na Pot Mosbi.

"Dispela kain eksen i kamap kriminel eksen we lo bai mekim save long man o meri husat i katim pawa na

kamapim blekaut," Mista O'Neill i tok.

Mista O'Neill i tok em i tok-save pinis long Siaman bilong PPL bod long bihainim wanpela lo ol i kolim Essential Sevis Act long holim, sasim na kalabusim ol manmeri husat i asua long katim pawa saplai.

"Mi toksave pinis long Sif Seketeri Isaac Lupari long kamapim wanpela miting bilong Nesenel Sekyuriti Advaisori Komiti. Mipela i lukim dispela pasin bilong katim pawa olsem wanpela sekyuriti samting.

"Mi bai no inap isi long ol dispela kain manmeri husat i ting ol i stap antap long lo na

mekim ol nogut samting long laik bilong ol yet.

Ol dispela manmeri husat i wok long katim pawa saplai i wok long mekim bikipela pasin nogut stret na kamapim hevi long laip bilong ol arapela manmeri long tupela bikipela siti bilong yumi," Mista O'Neill i tok.

Em i tok sampela ol raskol i wok long katim na bagarapim ol pawa lain, wankain olsem sampela ol raskol i bin katim ol telepon lain bilong Telikom.

Mista O'Neill i tok save pinis long ol polisman long lukluk long dispela samting na holim ol manmeri husat i mekim dispela trabel.

NCC gat nupela ekting dairekta



Colin Taimbari (namba 2 long lephan) em i nupela Ekting Dairekta bilong NCC. Poto: Nicky Bernard

WANPELA senia jenelis i kamap ekting dairekta bilong National Cultural Commission (NCC).

Minista bilong Sports na Turisim, Justin Tkatchenko, i

tokaut long dispela wik Tunde olsem ol i makim Colin Taimbari, husat i wanpela senia niusman na midia kodineta bilong Tourism Promotion Authority (TPA), i kamap ekting

dairekta bilong NCC.

Mista Tkatchenko i tok em i bilip olsem Mista Taimbari em i fit long holim dispela wok, na em bai mekim gut ol wok pas-taim dairekta, Dokta Jacob

Simet, i bin mekim na lusim.

Mista Taimbari i tok tenkyu long Mista Tkatchenko na gavman long bilip long em na larim em i kamap nupela ekting dairekta bilong NCC.

SAVING FOR A REASON?



SAVINGS IN A JAR

- ✓ Easy access to spend.
- ✓ No interest earned.
- ✓ Funds are not secure.



SAVINGS BSP PLUS SAVER

- ✓ No Card Access.
- ✓ Tiered credit interest.
- ✓ Linked to Mobile & Internet Banking.

A BSP Plus Saver Account for every savings goal

- Home Equity
- Dream Wedding
- Medical Bills & Emergencies
- Birthday Party
- New Gadgets & Phone
- Overseas Holiday



www.bsp.com.pg f t in

Wol TB De: Bung long pinisim TB long PNG

LONG dispela Wol TB De, 24 Mas 2016, Australia Gavman i tokaut gen long tingting bilong em long wok wantaim PNG Gavman, wantaim ol komyuniti, developmen patna, sivel sosaiti na praivet sekta long "Bung Wantaim long pinisim sik TB."

TB em i wanpela bikpela sik we i save kamapim dai, winim ol narapela bikpela sik long PNG, maski i gat marasin bilong kilim binatang i stap.

Nesanel Dipatmen bilong Helt, i tok moa Inog 28,000 lain i kisim sik TB long 2014 na bikpela namba i bin stap long ol 'hotspot' olsem Nesanel Kepitel (NCD), Galp na Westen Provins.

Taim multi-drag risisten TB o MDR-TB i kamap, em i mekim wok i hat moa long daunim sik TB.

MDR-TB i save nidim marasin longpela taim, planti marasin na bikpela mani long tritim ol sikman na meri.

PNG em i gat bikpela namba tru bilong ol lain i gat MDR-TB long wol, na bikpela tru i stap long Daru Ailan long Westen Provins.

Long stopim MDR-TB long em i no ken go bikpela, Westen Provins Helt Opis i kisim sampela moa helpim Inog kirapim gutpela lokal



Australian Hai Komisina Minista Kaunsela, Benedict David i givim toktok bilong em.

lidasip, strongim ol sevis bilong sekim binatang long ol siklain wantaim ol bikpela savelain bilong Burnet Institiut long mani mak bilong \$2.0 milien.

Narapela \$1.4 milen gren i go long Wol Vision Inog kamapim ol komyuniti autris senta long painim gut ol pipel husat i kisim sik TB, o i gat binatang.

Em i fandim 23 dokta, nes na ol arapela helt woka na sapot wokman na wokmeri long wokim dispela rispons.

Dispela invesmen long Westen Provin nau i wok longmekim

bikpela senis.

Namel long Jun 2014 na Desember 2015, ol hap lain bilong ol siklain husat i gat MDR-TB i stap long ke bilong ol narapela em i go antap long 65 pesen i go 99 pesen.

Long Desember 2015, i bin gat 344 sikman na meri husat i wok long kisim DOTS terapi, em i standet tritmen bilong TB, na ol dispela keis we ol i kisim ol long yia 2014.

Moa long hap namba i bin kamap gut wantaim marasin.

Gavman bilong Australia i wok long painim ol nupela wei bilong

pinisim sik TB epikemik long PNG. Wantaim wok bung na toktok wantaim na toktok wantaim ol komyuniti na ol patna ejensi, bikpela senis inap kamap na PNG inap long kisim mak bilong Wol Helt Ogenaisesen long no gat TB sik long kantri na i no gat man o meri bai dai long sik TB taim yumi kisim yia 2030.

Wanpela sikmeri long Daru Ailan i tok, "Mi statim MDR-TB tritmen na mi kisim yet marasin long Daru Jeneral Haus sik na ol nes i save bosim mi na mi no save lusim marasin.

Mi pilim olgeta sait pen, na mi toksave long ol dokta na mi stat long toktok wantaim ol wokman na wokmeri long ol pret tingting bilong mi na ol i givim gutpela tok-save na kaunseling.

Ol i save tokim mi long kaikai gutpela kaikai na malolo planti."

Australia bai helpim yet PNG long wok bilnog rausim Tubekulosis long Papua Niugini.

PNG i gat bikpela namba tru, 25,000 pipel i kisim tes long olgeta yia i soim ol i gat binatang bilong TB (PNG).



Save the Children wantaim bena bilong ol long taim bilong selebresen.

Polye tok O'Neill i no fit long menesim ikonomi

PRAIM Minista Peter O'Neill i no fit long menesim ikonomi bilong Papua Niugini, Oposisen Lida Don Polye, i tok.

Mista Polye i tok Mista O'Neill i no fit long menesim gut ikonomi bilong dispela kantri taim em yet i tokaut olsem Benk ov PNG i laik kisim wanpela dinau mani long stretim hevi bilong foren eksens.

Mista Polye i bin tok strong long Mista O'Neill i lusim sia bilong Praim Minista bikos em i gat planti ol kot i bilong em i stap na nem bilong em i go bagarap pinis.

Las wik Praim Minista O'Neill i tokaut long Sentral Benk i laik kisim wanpela dinau mani long Internationa Finance Corporation na World Bank. Benk ov PNG i wok stretim ol toktok wantaim IFC na sapos ol komesal benk i wanbel long larim dispela mani i kam na stap long benk bilong ol, IFC bai salim US\$250

(K780 milien) i kam long PNG.

Bihain long dispela toktok i kamaut long maus bilong O'Neill yet, Mista Polye i tok dispela i soim olsem Mista O'Neill i no fit long ranim gut dispela kantri na lukautim ikonomi bilong PNG.

"Em i no fit long menesim gut mani na ikonomi olsem na em i wok long askim IFC long kisim narapela moa dinau mani gen," Mista Polye i tok. Las wik long Palamen, Mista Polye i bin askim Mista O'Neill long risain na lusim sia bilong praem minista bikos nem bilong em olsem praem minista i go bagarap pinis.

Wanpela as long Polye i laikim O'Neill long risain em long bikpela mani gavman i bin peim long Paul Paraka Lawyers, we dispela em i stap long kot yet.

Mista O'Neill i tok em redi long lusim sia bilong praem minista sapos Mista Polye i givim evidens na soim wabem ol samting O'Neill i bin mekim.

"Mi redi long risain sapos Oposisen Lida i soim ol evidens olsem mi kisim wan toea long dispela o mani gavman i bin peim long Paul Paraka.

"Mi no bin kisim wan toea long dispela na mi laikim Oposisen Lida long pasim maus bilong em bikos dispela samting em i stap long kot," Mista O'Neill i tok.

Sait bilong ikonomik menesmen, Mista O'Neill i tok PNG i bungim dispela hevi wankain olsem ol arapela kantri tu i wok long bungim bikos prais bilong ol komoditi olsem gol, kopa, oil, ges na nikel i pundaun.

"Dispela i no kamap long PNG tasol. Em i kamap long olgeta hap long wol. Ikonomi bilong Saina i pundaun na dispela i lukim ol kantri husat i save Salim ol samting i go long Saina i bungim dispela hevi.

"Gavman i no kamapim dispela hevi. Em hevi bilong intenesenel maket," Mista O'Neill i tok.

Tomuriesa: Mipela sevim sampela bus bilong bihain taim

FORES Minista Douglas Tomuriesa i tok National Forest Authority (NFA) i sevim tu milien hekta bilong bus, graun na wara long larim ol pikinini long bihain taim i yusim.

Mista Tomuriesa i tok dispela tu milien hekta bus i gat ol bikpela na gutpela diwai inap long katim na salim nau tasol NFA i mekim disisen long larim em i stap long helpim fiutsa jeneresen bilong PNG i yusim.

"Dispela bus inap long kamapim milien kina na helpim ikonomi bilong yumi long gro tasol



FORES Minista Douglas Tomuriesa

mipela i les long katim olgeta diwai nau," Mista Tomuriesa i tok.

Em i tok NFA i lusim dispela

bus long larim sampela ol diwai na animal i stap insait long dispela bus i stap yet, na i no ken dai.

Mista Tomuriesa i mekim dispela toktok long dispela wik Tunde long Palamen.

"Pastaim tru ikonomi bilong PNG i bin stap long forestri.

Nau yumi gat maining na LNG na arapela ol samting bilong mekim mani long ranim kantri," em i tok.

Mista Tomuriesa i bin mekim dispela toktok taim em i bekim askim bilong Westen Gavana, Ati Wobiro, husat i bin askim em long olsem wanem loging operesen i kamap long Westen Provins.



PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

The modern answer to your surgical needs: Laparoscopy

Surgery can be sometimes the only resort to give relief to a person suffering from a problem. With the recent advancement in medical science, surgical procedures have also improved the approach of treatment. There has been a transition from open surgeries (that required larger cuts) to much advanced minimally invasive procedure i.e. Laparoscopic Surgery (involving small cuts).

What is an Open Surgery?

Open surgery or traditional form of surgery involves making a large (usually 8 cm to 10 cm) cut in the area to be operated to expose the part of the body on which the operation is to be performed. This procedure needs extra care post-procedure and a longer stay in hospital (nearly five to seven days, but may vary from case-to-case scenario) and in some cases it may be up to few weeks before you are able to return to normal activities. In addition to the disruption to your family life and employment, open surgery also carries a bigger risk of adhesion and infections. This is due to the increased exposure of body tissue to the external environment that is necessary in open surgery.

Laparoscopy - The modern surgical intervention

Laparoscopic technique has now become one of the widely

accepted and preferred techniques in cases of surgical interventions. The procedure is basically carried out by making small cuts on the body and using long and slender instruments inserted in the body guided by a camera.




As the cuts are small the recovery is also quick as compared to its counterpart - open surgery. Procedures such as hernia repairs, gastric bypass, bowel resection, and organ removal are now routinely carried out laparoscopically. Now, laparoscopic surgeries have made its way into PNG at few hospitals. Some of the laparoscopic procedures that people of PNG can avail are:

Removal of gallbladder/gallbladder stones: This is the best method to treat gallstones. The surgery removes gallbladder and gallstones through few small incisions in the abdomen. It can be done as an outpatient procedure and patient can return to normal activities in 7 to 10 days.

Removal of appendix: Laparoscopic Appendectomy involves removing the infected appendix. The procedure involves making 3 to 4 small incisions in the abdomen to insert mini-

ature camera and surgical instruments. The surgeon then removes the appendix with the instruments, so there is usually no need to make a large incision in the abdomen.

Kidney stone treatment: Kidney and urinary stones are effectively treated with laparoscopic techniques. Laparoscopic kidney procedures are performed under general anaesthesia and last 2 to 4 hours. Complications are minimal with high success rates.



Examining and treating digestive tract disorders: Involves inserting a thin tube called endoscope through the mouth or other openings. Used for investigation of abdominal pain, vomiting, difficulty swallowing, etc. Endoscopy is also used to perform biopsy and cauterization, widening of oesophagus and so on.

Arthroscopy technique: For diagnostic and surgical procedures of joint conditions involving shoulder, knee, elbows, etc. It can be used to: repair damaged cartilage, drain away any excess fluid, and treat conditions such as arthritis, frozen shoulder or carpal

tunnel syndrome.

Treatment and diagnosis of female reproductive disorders: Laparoscopy is the most common procedure used to diagnose and remove endometriosis. Using a laparoscope, your surgeon will cut, remove tissue (excision) or destroy it with a laser beam or electric current. The procedure usually takes 30 to 45 minutes.

Laparoscopic Prostatectomy: It is a minimally invasive surgical treatment for prostate cancer. It involves a few key hole incisions in order to remove the whole prostate. The procedure takes about 2-3 hours.

- The benefits of laparoscopy
- No need of large cuts
 - Less blood loss
 - Less pain
 - Less scarring
 - Shorter hospital stay
 - Fewer complication as compared to conventional method
 - Faster recovery


Laparoscopic surgery is the solution for many problems but not the answer for all kinds of problem. There might be conditions where conventional or open surgery is the only possible method to be performed. Example:

People with repeated surgeries in the same area of the body may develop scar and this makes skin rigid, which is very difficult for the minimal invasive tools to enter the abdomen to carry out further medical procedures.

Patients, who take blood thinners, may have an increased risk of bleeding when certain procedures are performed laparoscopically compared to open surgery.

Know about your laparoscopy surgeon

All surgeons undergo the same training and learn the open approach but only some surgeons perform the laparoscopic technique as it deals great precision and skills to come with successful outcomes. So it's required for a surgeon to be trained to perform such procedure.



Conditions where laparoscopy is beneficial:

- Endoscopic evaluation and surgical treatment
- Hernia repair
- Colorectal surgery
- Bariatric (obesity) surgery
- Onco surgery
- Simple mastectomy
- Radical and modified radical mastectomy
- Breast conservation surgery



MAKING SURGERY EASIER WITH LAPAROSCOPY

Minimally invasive surgery, the boon from medical science now at PIH

- Less pain
- Smaller cut
- Less bleeding
- Faster recovery

Some common conditions where laparoscopy is needed:

- Gall bladder stone
- Appendicitis
- Hernia repair
- Uterine problems



Pacific International Hospital: Sec 105, Lot 2, Taurama, 3 Mile, Port Moresby, PNG, Ph: 799 88 000
 PIH Clinic: Ground Level, Vision City Mega Mall, Waigani Drive, Port Moresby, PNG, Ph: 7100 2873
 info@pihpng.com | www.pihpng.com | @pihpng | #pihpng



Lukluk bilong liklik Tasha long Ista...



Tasha Wilson

Em i namba wan taim long liklik Tasha Wilson i go skul long dispela yia. Long dispela yia, Ista em i namba wan taim i kamap long em long skul ples we ol pikinini i mekim pilai (drama) bilong ista long ai bilong em.

Liklik gel i amamas tru long ol pikinini i mekim pilai bilong ista we ol soldia i holim Jisas na paitim em taitim em long rop na ol i tokim em long wokabaut.

Bihain long skul i pinis, mama papa bilong Tasha i go kism Tasha long skul ples na ol i go bek long haus.

Long hap rot, Tasha em stori long wanem samting i kamap long skul tude. Em i tok tude ol i mekim drama bilong Ista.

Em i stori nau, “mami na dedi, tude, bata Jisas ol i paitim em nogut tru, ol i taitim rop long han bilong em, ol taitim rop long het bilong em, ol karim em i go

autsait na tokim em long wokabaut nau.

Ol i tokim em long wokabaut stret i go long polis stesin na lokim em.”

Tupela mami dedi lukluk bek long kar we Tasha i sindaun na lukim olsem liklik gel em siries stret long stori bilong em, ol i dai long lap.

Ha ha ha! liklik Tasha, yu jest mekim dispela ista wiken i kamap gut stret long stori bilong yu tasol!

YU WIN!

750 pisamen bai kamap memba bilong Nambawan Super

MOA long 700 pisamen o ol manmeri bilong kism pis long 14 kostal provins bai gat sans long kamap memba, sevim mani na larim mani bilong ol i go long Nambawan Super Limited (NSL).

Dispela em i wanpela gutpela sans long larim ol liklik manmeri long ples i sevim mani na larim mani i gro aninit long lukluk bilong NSL.

Bihain long wanpela agrimen NSL i bin sainim wantaim Costal Fisheries Development Agency (CFDA) long Trinde dispela wik, 750 pisamen i stap aninit long lukluk bilong CFDA bai stat putim mani long NSL.

Sif Menesa Memba Sevis bilong NSL, Charlie Gilichibi, na Eksekjutiv Dairekta bilong CFDA, Kevin Kautu, i bin makim maus bilong tupela ogenesisen na sainim dispela agrimen long Pot Mosbi.

Mista Kautu i tok planti ol dispela pisamen i stap long ples na ol i save painim hat long sevim liklik mani ol i save kism long pis ol i save kism long solwara na salim.

“Wantaim dispela agrimen namel long CFDA na NSL, mi amamas tru olsem dispela bai givim sans long ol liklik manmeri i stap long ples long sevim mani na larim in-



Kevin Kautu (lephan) na Charlie Gilichibi i sekan bihain long tupela i sainim agrimen long larim ol pisamen i kamap memba bilong NSL voluntari kontribusen.

vesmen bilong ol i taim NSL i stap long Sen-tral, Galp, Is Nu Briten na arapela 8-pela provins i stap arere long solwara.

Mista Gilichibi i tok tenkyu long CFDA i kism ol dispela lain i kam long sevim mani wantaim bilong NSL.

“Mipela i amamas long ol dispela 750 pisamen. Ol i mekim gutpela disisen long laip long sevim mani wantaim NSL.

“NSL i wok long gro na mipela i kamapim planti gutpela samting we ol memba bilong mipela i wok long kism benefit.

“Ol dispela nupela lain bai gat sans long kism ol dispela benefit.

Ol patna bisnis haus bilong NSL i wok long

givim ol diskaun prais long ol samting ol i wok long salim na dispela em i wanpela gutpela sans long helpim ol dispela 750 manmeri tu long benefit.

“Mipela i gat 80 bisnis haus we ol i save givim ol diskaun prais long ol memba bilong NSL.

“Brens bilong NSL tu i wok long gro. Nau mipela i gat 17 brens long olgeta hap long PNG na i no long taim bai mipela i opim 30 nupela brens.

“Dispela bai givim sans long ol memba bilong lukim sevangs bilong ol i go wantaim NSL,” Mista Gilichibi i tok.



INVESTMENT TOKTOK with DR. STEPHEN NASH

Bungim ol dot: ol fainens long wol i go pundaun

Sapos yu gat sampela askim, plis salim i go long toktoksuper@nambawansuper.com.pg na mipela bai bekim.

Long las mun NSL i soim olsem ol invesmen em i no gat promis long mani bai kamap, tasol wok bilong invesmen em pas tru wantaim ol mani bilong ikonomi we ol invesmen i save yusim long mekim wok.

Dispela mun, NSL i laik toktok moa long wanpela toksave i kamap long las mun, taim ol i lukim wanem hevi i kamap long taim ol prais bilong ol samting bilong treid i go daun na long wanem kain we em i mekim senis long ol prais bilong ol global fainensol entity, insait long wanpela bikpela intres reit, insait long Yunaitet Stets.

Komoditi

Ol prais bilong ol komoditi o samting bilong salim, i bin pundaun hariap tru insait long 2015 na tu long 2016. As bilong ol prais i pundaun i em ol wankain samting tasol we i save go pas long ol prais i pundaun long ol global ikwiti. Planti bilong ol dispela samting we i save mekim ol prais i pundaun, em i soim piksa bilong mani i gro tu. Pastaim long 2015, ol global maket i ting olsem gro bilong Saina bai inap long winim isi, isi gro bilong Yurop na Siapan. Tasol, taim gro bilong ikonomi long Saina i pundaun, long 2015, em i mekim ol fainensol maket i tingting planti. Moa klostu em gro bilong Yunaitet Stets em ol i lukim olsem em i no gat inap strong, long holim gutpela reit bilong global gro.

Wari bilong global benking bilong ol komoditi

Nau, sapos wanpela risos kampani i no inap long baim ol winmani bilong ol seaholda, yumi bai kism tingting olsem ating i gat ol narapela samting tu we kampani bai i no inap long baim. Long pasim tok, dispela em wanem samting ol fainensol maket i wok long mekim nau, we ol fainensol maket nau i wok long aski, “... Bai yumi mekim wanem nau?,”

Wanpela eksampel ating bai givim sampela tok skul

Olsem, tok piksa, XYZ kampani i kism dinau long mak bilong USD 100 milien, bikos em i putim bilip long ol mani bai kamap long ol komoditi prais, long mak bilong USD 100 long wan baeri prais. Nau, ol dispela mani mak i pundaun bikpela tru, long mak bilong USD 100 i go daun long USD 30. Em i minim olsem kampani XYZ i gat liklik mani tasol i kam insait long em bai bekim dinau, bikos ol mani i kam insait i pundaun bikpela tru. Nau ol fainens maket i wok long pilim olsem dispela kain pundaun long strong bilong XYZ, long bekim dispela dinau em i kism , long ABC benk, bai go pas long ABC benk long apim ol pe bilong ol dinau nogut. Benk i apim ol fi long wanem em i laik banisim em yet long taim no gut ol kampani husat i dinau bai i no inap long bekim dinau. Dispela kain gro bilong givim aut dinau gen i mekim ABC benk i no inap long givim olgeta mani dividen o winmani.

Olsem na ol komoditi prais i mekim risos kampani olsem XYZ long katim daun winmani, na ABC benk bai wokim wankain samting tu; long katim ol winmani.

Taim ol dividen o winmani pundaun, em i no save strongim ol sea prais, bikos ol sea prais i save soim piksa bilong dividen we i wok long go bikpela insait long ol yia i go. Ol liklik dividen o winman, nau wantaim ol arapela samting tu, i go pas long daunim ol sea prais i go daun moa. Tok piksa olsem, sampela bikpela benk long Yurop i pundaun go daun moa, em mak we ol i no bin lukim long planti yia.

Wanem taim bai komoditi prais i stop long pundaun?

Ol fainensol maket i mas pilim gut long gro bilong ol, em nau ol komoditi bai stop liklik long pundaun , o long go bek gen. Antap long olgeta tudak stori no gut bilong ol komoditi prais, na agro, US Federal Risev nau i stap long wanpela taim bilong apim ol sotpela taim intres reit. Taim ol reit i go antap, em i minim olsem bai i no gat bikpela gro, olsem na ol kampani i mas was gut long ol mani ol i tromoi, “ausait long tebol”, pastaim long maket i stat long go daun isi. Yumi ken tingting olsem, em bai kism longpela taim long US Federal Risev long stopim ol reit long go antap, na ikwiti maket prais i mas go daun yet long dispela taim pastaim long US Federal Risev i stop long apim ol intres reit.

Namel long planti samting, dispela i bin olsem yumi mas tingim olsem wok bilong ikwiti invesmen, bai i no mekim bikpela mani olsem yumi lukim i no longtaim i go pinis.

Pinisim toktok

Ol fainensol maket i no save lukim banis namel long ol kain kain sekta, insait long ikwiti maket. No gat, ol i save lukluk long wanem kain rot ol i kam bung wantaim, “ol i bungim ol dot”. Taim ol komoditi prais i go daun em i save mekim ol mani i kam insait i go daunt u long ol kampani, we ol gen i tanim na givim liklik winmani tasol i go long ol seaholda bilong ol benk, husat i givim dinau mani long risos kampani, namel long ol arapela samting.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIGGER, BETTER, SAFER,
STRONGER AND STILL NUMBER 1

Nupela skolasip bilong helpim ol sumatin long ol LNG Provins

OL sumatin insait long ol PNG LNG Projek eria bai kisim nupela skolasip i kam long ExxonMobil PNG na Australia Gavman aninit long Australia Awod Pasifik Skolasip program.

Australia Awods - PNG LNG Skolasip bai helpim long kamapim strongpela rural wokfos insait long PNG LNG Projek eria. Em bai strongim tu ol sumatin long pinisim ol teseri stadi bilong ol long wok bilong helt na edukesen.

edukesen i stap long ol institusen insait long kantri we ol i aplai long helt na edukesen i kisim spes long ol institusen long Papua Niugini we ol i makim. Ol lain i winim eplikesen i go wantaim ful tuisen fi, balus tiket na alawens bilong stap long skul.

Ol lain i winim seleksen em ol i kisim ol long save bilong ol long skul na long strong bilong ol long helpim komyuniti bilong ol.

ExxonMobil PNG men- esing dairekta Andrew

Barry i tok ol skolasip i luk- luk long ol sumatin we i save stap long ol rural ples na i longwe tru long ol provins we PNG LNG i gat wok long en.

“As tingting bilong dispela program em long kamapim na strongim wanpela profesenel wok- fos long Papua Niugini we i gat save long mekim wok gut.

“Mipela i amamas long patna wantaim Australia Gavman long givim wan- pela skolasip program we i strongim akademik ekse-

lens,” Mista Barry i tok.

Mista Barry i tok Exxon- Mobil PNG edukesen pro- gram i laik kamapim sans bilong ol dispela manmeri inap long painim wok, bi- hain long PNG LNG Projek i pinis.

Ekting Australia Hai Komisiona Bronte Moules i tok olsem Australia Gav- man i sapotim skolasip program insait long Papua Niugini nau i winim 40 yia pinis.

“Edukesen em i wanpela pos bilong helpim ikonomi bilong Papua Niugini taim



PNG LNG Skolasip wantaim Australia Gavman.

em i wok long senis. Taim ol leba maket i go bikpela long Papua Niugini, invesmen yet long kamapim ol wokfos i gat save long wok, long lukim olsem Papua Niugini inap long yusim olgeta sans i stap long kamapim

trupela senis,” Mis Moules i tok. Gavman bilong Australia i amamas long wok bung wan- taim ol praivet sekta long kamapim ol nupela kain wei long strongim edukesen sekta long Papua Niugini.

I gat planti salens long wok bilong ol polis

PLEN bilong kirapim ol Famili na Seksuel Vailens Yunit (FSVU) long kantri em i stap insait long bikpela driman bilong Royal Papua Niugini Kon- stabuleri (RPNGC) long givim sevis i go long ol dispela lain husat i nidim tru helpim.

Dispela em i hap toktok bilong Deputy Polis Komisiona Op- eresen, Jim An- drews, long taim em i opim wanpela nu- pela FSVU long Kerema long las wik.

Mista Andrews i tok oltaim ol pablik i no amamas long ol polis i no hariap long helpim ol lain i kom- plen long ol hevi bi- long famili na seksuel vailens. Em i tok dispela i tru, tasol bihain long

wanpela tok save pepa ol i kolim Sekula Namba 6 bi- long 2007 i kamap, ol polis i wok long hariap long helpim ol lain husat i bungim dispela kain hevi.

Em i tok FSVU em i wanpela spesel yunit bilong helpim ol lain husat i bungim hevi bilong famili vailens o seksuel vailens. Ol polis opisa bai helpim long raitim ripot, hariap long kotim ol lain i kamapim dispela hevi. Sampela taim ol polis i helpim ol long kisim kaunsel- ing na painim seif ples bilong stap.

Mista Andrews i tok ol polis i save bungim planti salens tu long dispela wok. Em i tok ol i sot long ol wokman na ol ara-

pela samting ol i nidim long wok bi- long ol.

Em i tok RPNGC i mas gat ol opisa husat i kisim trening long wok bilong FSVU. Ol i mas gat transpot na komyunikesen fasiliti na ol arapela samting long mekim wok bilong ol.

Em i tok tu olsem wok bilong ol polis em long kotim man i mekim rong. Tasol planti taim meri o pikinini husat i kisim bagarap i nidim helpim bilong ol narapela lain tu.

I no gat gutpela referel sistem tude na planti taim ol lain i putim sas bai i go bek na askim long rausim dispela sas.

Em i tok dispela pasin i givim bikpela salens moa long wok bilong ol polis tude.



Ol bikman na bikmeri bilong Boroko Polis Stesen famili Seksual Vailens opis i sanap wantaim ol lain bilong UNFPA na Australia Gavman long taim bilong opim nupela FSVAC polis yunit long Boroko - 2014. Wantok fail foto

Ol tisa mas sekap long Provinsal Edukesen Opis

DIPATMEN bilong Edukesen bai i pasim Klain Sevis Kaunta long Fincorp Haus long Waigani long 31 Mas.

Ol tisa husat i laik sekap long pe bilong ol i mas go bek long Provinsal Edukesen Opis bilong ol long ol Provinsal Institusen na Tising Divison. Ol dispela divison bai sekap wantaim Tisa Sevis Komisin na Perol Divison bilong Dipatmen.

Ekting Seketeri bi- long Edukesen, Dr Uke Kombra i mekim dispela tok save long Sekula Namba 6 bi- long 2016 long Fraide Mas 10.

Dr Kombra i tok dispela Klain Sevis Kaunta i bilong ol bis- nis bilong edukesen na i no bilong sekap long pe bilong ol tisa. Em i tok dispela kaunta i bilong sevim ol tisa long taim bi- long krismas na skul holide tasol.

Dokta Kombra i tok ol askim bilong pe bi- long ol tisa i mas go stret long ol Provin- sal Edukesen Opis bikos ol opisa bilong Provinsal Saleri i kisim trening pinis na ol i klia long wei bi- long prosesim pe bi- long ol tisa.

Em i givim strong- pela tok lukaut tu i go long ol tisa long no ken go antap long Perol Divison long Fincorp Haus sekap long pe bilong ol.

SP Foundation bai helpim pablik sevan

SP Brewery i lonsim SP Foundation las wik Fonde long taim bilong Ista na wanpela gutnius i kam wantaim dispela lonsing.

Dispela gutnius em i bikpela sapot SP Founda- tion bai givim long skulim ol pablik sevan long PNG Institute of Public Administration (PNGIPA) long helpim ol pablik sevan i go skul gen na kisim moa save.

Menesing Daireka bi- long SP Brewery, Stan Joyce, i tok SP Founda- tion bai givim K200, 000 olgeta yia aninit long wanpela skolasip ong helpim ol pablik sevan I go skul gen long PNGIPA.

“Mipela i amamas long kamap namba wan kampani long helpim gavman long kirapim



(L-R) John Kali, Stan Joyce, SP Foundation siaman Bath Philemon na SP Brew- ery siaman, Sir Joseph Tauvasa.

kepasiti bilong pablik sevis.

“Wok manmeri bilong gavman em i namba wan samting wankain olsem wok ol i save mekim long larim kantri bilong yumi i ran gut,” Mista Joyce i tok.

Em i tok dispela i no

namba wan taim SP i wok long sapotim man- meri PNG.

“SP i save sapotim planti ol komyuniti wok. Spot em i wanpela bikpela eria we SP i save sapotim.

“Tasol nau mipela i skelim olsem i gat

bikpela nid long helpim gavman long kirapim pablik sevis.

“Olsem na mipela i amamas long tokaut long dispela skolasip program aninit long SP Foundation,” Mista Joyce i tok.

Skul i mas givim relijes edukesen

Ale Asa i ratim

KATOLIK ejensi skul mas givim relijes edukesen (RE) long mekim yangepla i gro wantaim sprituel sait na tu long fisikel sait.

Relijes edukesen kodineta na namba tu Katolik edukesen sekereteri bilong Wabag Daiosis, Benson Sakan i mekim dispela tok long taim em givim wan wik trening long ol reijes edukesen tisa bilong ol Katolik skul insait long Enga provins las wik.

Mista Sakan i tok ol ejensi skul i mas kamapim wan wan de relijes edukesen program wantaim ol narapela kos bikos em i namba wan tru long gutpela bilong ol pikinini long bihain.

"Relijes edukesen em i namba wan tru bikos ol kain kain senis na teknoloji i wok long bagarapim skul wok na tu spirituel sait bilong ol skul pikinini long dispela taim.

Planti skul pikinini husait i no lotu na i no gat relijes edukesen klas ol i isi long bihainim pasin nogut arapela pren i mekim olsem

smok spak brus, dring bia na hombru, lukim piksa nogut long fon na planti moa," Mista Sakan i tok.

Sakan i tok ol skul i mas i gat relijes edukesen tisa husat i save gut long Tok bilong God long lanim ol sumatin bai dispela i ken mekim ol sumatin i stap bel isi na skul gut na abrusim ol pasin no gut bai bihain sindaun bilong ol i ken kamap gut.

Ol 20 relijes edukesen tisa bilong wan wan ejensi skul i bung wantaim long kirapim tingting bilong relijes edukesen program na tu long redim ol long Ista pestode.

Ol skul husait i stap insait em ol; St. Joseph Kasap praimer skul, Sacred Heart Mang praimer, Sen Martin De Pores Bioko komyuniti skul, Holi Famili Sari praimer, Sacred Heart Sikiro praimer, Holi Kros Pompabus praimer, Sen Thomas Pumakos praimer, Sen Anna Imangabus praimer, Sen Joseph Wanepap praimer, Keman praimer, Naiepalam praimer, Sen John Londor praimer, Sen Martin De Pores Par praimer skul na ol narapela.



Ol RE tisa i stap long bung bilong ol long Holi Spirit Senta Par long las wik.

Yunaitet Stet Embesi tokaut long 2017-2018 Fulbright skolasip

YUNAITET Stet Embesi long Pot Mosbi long dispela wik i bin amamas long tokaut long 2017-2018 J. William Fulbright Greduet Skolasip bilong ol sitisen bilong Papua Niugini, Solomon Ailan, na Vanuatu.

Fulbright skolasip bai baim skolasip bilong ol husat kenidet i winim, inap long tupela yia long stadi long ol yunivesiti bilong Yunaitet Stet.

Ol bai makim ol lain husat i aplai long lukim save bilong ol long skul na kain lidasip skil ol i gat.

Ol eplikesen bilong go insait em bai ol i kisim long internet tasol, long dispela taim. Eplikesen i op nau na bai i pas long Me 27, 2016.

Ol sumatin husat i winim skolasip bai skul long kisim wanpela Masta ov Ats (MA), Masta of Saiens (MS), Masta of Pablik Edministresen (MPA), o wanpela Masta bilong LO (LLM) digri.

Ol lain bai kisim soklasip bai kisim wanpela tuisen gren bilong baim ol kos wok bilong ol na wanpela staipen o alawens bilong wan wan mun long lukautim ol long taim ol i stap long U.S.A.



2015 Fulbright skola Rose Andrew bilong PNG wantaim ol narapela bilong Pakistan, Mozambique na Afghanistan husat i bin stap insait long Yunaitet Nesens Konprens long Nu Yok.

Ol bai kisim tu wanpela raun trip transpot mani na mani bilong lukautim helt insurens bilong ol. Antap long dispela, ol bai go sindaun long ol spesel ektiviti insait long ol program bilong ol long helpim stap bilong ol na long helpim ol long lainim samting isi long hap.

Ol dispela ektiviti em i gutpela sans long wok bung wantaim ol narapela Intenesenel Fulbright skola na long toktok na stap wantaim ol biknem Amerika pipel long olgeta eria bilong laip.

Ol kenidet husat i winim skolasip bai mas go long Yunaitet Stets stat long Ogas 2017 long

statim ol sampela akademik stadi i go pas long skolsaip program.

Dispela J. William Fulbright Program em i nambawan intenesenel edukesenel eksens program we U.S gavman i sponsa long en long strongim wok bung na gutpela tingting wantaim ol pipel bilong Yunaitet Stets na ol pipel bilong ol narapela kantri long wol, olsem Papua Niugini, Solomon Ailan, na Vanuatu.

Antap long dispela biknem Fulbright Skolasip, ol lain husat i winim bai i kamap memba bilong global netwok bilong bikpela nem Fulbright

alumni we ol i gat luksave insait long gavman, saiens, ats, bisnis, filantropi, edukesen, na etletiks. Namel long ol 44 Fulbright alumni long 12-pela kantri i kisim pinis Nobel Prais, na 81 alumni husat i kisim Pulitzer Prais na 20 Fulbright alumni husat i bin stap olsem het ov stet o gavman.

Pablik Afeas Seksen bai holim wanpela woksop long tok klia moa long eplikesen proses na bekim sampela askim bilong ol lain husat i laik save moa, long Fonde, Epril 21 long 1 klok apinun insait long Ameika Kona bilong Nesenel Laibreri long Waigani.

"Ol skul insait long Yangoru-Sausia tok tenkyu long Maru

OL TISA na sumatin bilong ol skul insait long Yangoru-Sausia ilektoret we ol sevis i bin abrusim ol longpela taim tumas, nau i gat bikpela amamas long lokol memba, Richard Maru. Em i harim kraiblong ol na i bringim sampela senis.

Ol tisa na ol sumatin long tupela skul insait long Sausso Lokal Level Gavman (LLG) bilong Yangoru-Sausia Distrik i amamas long lokal Memba na Minista bilong Treid, Komes na Industri, Richard Maru long luksave olsem edukesen bilong ol pikinini em i bikpela samting tru na ol i mas sindaun gut insait long gutpela klasrum long lainim samting.

Mista Maru i bin go long Urimo Praimeri Skul na Wamba Komyuniti Skul long las wik we ol tisa na sumatin i bin tok olsem i no gat wanpela memba bilong palamen bipo i bin luksave long dispela. Olsem na ol i tok olsem ol i amamas tru long Mista Maru.

Urimo Praimeri Skul i bin stat 12-pela yia i go pinis, tasol ol i no lukim wanpela haus kapa klasrum o haus tisa i sanap i kam inap nau. Olgeta klasrum em i stap yet long bus diwai na morota i kam inap nau.

P & C Siaman bilong Urimo Praimeri Skul, Aaron Konge i makim maus bilong ol papamama na ol sumatin na i tok tenkyu long Minista Maru long statim nupela samting long wokim wanpela dabol klasrum na tupela haus tisa wantaim kapa na timba samting

we bai stap longpela taim.

Mista Konge i tok ol kain investimen bai stap longpela taim long ol pikinini inap kisim gutpela kwaliti edukesen.

"Ol pikinini bilong mipela i no bin kisim edukesen long kain gutpela klasrum olsem. Taim ren i save pundaun, ol sumatin i no save sindaun gut long lainim samting bikos ren wara i save kam insait long klasrum.

Wanpela dabol klasrum na tupela haus tisa nau i kirap wantaim mani mak bilong K250, 000.

Urimo Praimeri Skul i stap long hap bilong SEZ na em bai stap sambai long helpim ol investa, ol wokman na wokmeri na ol pikinini bilong ol insait long SEZ eria.

Hetmasta bilong Urimo Praimeri Skul, Brian Yause tu i mekim wankain toktok na em tok moa long wari bilong em long ol sumatin i no gat gutpela wara bilong dring.

Long wankain taim, Wamba Komyuniti Skul i wok gut na ol sumatin i amamas long kamap long skul olgeta de.

Wamba Komyuniti Skul em i nupela skul na dabol klasrum wantaim tupela haus tisa tu i kostim K250, 000.00. Distrik bai putim sampela moa mani i go insait long skul bihain gen long dispela yia.

Wanpela elementri -1 tisa, Thomas West i tok amamas long Minista Maru long wokim dispela skul bikos ol pikinini nau bai i no ken wokabaut i go longwe tru long narapela ples long kisim skul.

Wol TB De i kamap long 8-Mail na ATS setelmen

Steven Doe, Wol Visen PNG
Komyunikesens

OLGETA yia long de 24 Mas helt dipatmen na olgeta lain long wol i save holim Wol TB De long tingim hevi bilong sik Tuberculosis (TB) na long painim rot bilong rausim TB olgeta.

Las wik insait long Pot Mosbi, Wol Visen PNG Pot Mosbi Eria Program wokman na wokmeri i bin bung wantaim ol komyuniti bilong 8-Mail na ATS seteleman insait long Pot Mosbi Not Is Iektoret long mekim dispela luksave bilong Wol TB de.

Ol i bin statim ol luksave na ed-vokasi ektiviti bilong ol long bas stop stret bilong dispela tupela hap setelmen. Na insait long program em ol i no abrusim TB mascot na tritmen sapota, DOTSI, bilong Wol Visen.

Maskot DOTSI, i pulim ai bilong planti man meri wantaim ol stail danis bilong em. Na taim ol i kam klostu na ai bilong ol i opi i stap, ol wokman bilong TB Program i givim aut toktok bilong daunim sik TB.

Wanpela wokmeri bilong Wol Visen, Tresa Nahuet i tokim ol lain i bung olsem TB nau i wok long kalap i go long ol man hariap tru, bikos sampela ol sikman na sik-meri i save hambak na pilai, pilai nating long we bilong kisim marasin saplai bilong sik TB.

Taim ol i no save lukautim ol yet long dring gut marasin em binatang i no save dai na em i save kalap i go long ol narapela lain.

Ol tok skul i go long komyuniti i



Ol Wol Visen wokman na wokmeri i kisim poto wantaim DOTSY na sampela lain long ATS komyuniti.

DOTSY bungim ol komyuniti long 8-Mile.
Poto: Wol Vision komyunikesen.

toksave long wanem kain rot TB i save kalap i go, na tu long wanem kain rot bai ol i kisim marasin long daunim.

Ol i tok strong moa long we bilong tritmen bikos TB em i wanpela sik we i gat marasin tasol bikos long bikhet bilong ol sikman na ol famili bilong ol, dispela sik i save kilim ol man, meri na pikinini. "TB binatang em i save raun

long win tasol. Em i save stap long win yumi save pulim, tasol em i gat marasin bilong kilim i dai dispela binatang na tu long stopim em long em i no ken go long narapela sapos sikman i mekim gut wok bilong em long kisim marasin," Tresa i tok.

Narapela TB opisa, Emily Meren i toktok tu long ol kain kain stail bilong sik TB na wanem kain we bai ol i tritim ol. Em i tok klia moa tu

bilong wanem na sik TB em i save kamap planti long sampela hap nau na em i givim tok stia long ol lain husat i bin stap long bung long wanem we ol inap long stopim sik TB long go bikpela yet insait long komyuniti bilong ol.

"Marasin bilong sik TB em i fri. Mani yu bai tromoi em long bas fe tasol long go long klinik klostu long yu na kisim tes, no gut yu tu kisim

binatang bilong TB," Ms Meren i tok.

Wanpela komyuniti lida i tok tenkyu long Wol Vision wokman na wokmeri long kisim TB toksave i go stret long haus dua bilong ol na tokaut ples klia long ol long dispela sik.

Bikpela tingting bilong Wol TB De long dispela yia em "Bung wantaim long pinisim TB".

Hai Kwaliti Leboratori bilong sekim Drag-Risisten TB

NESENEL Dipatmen bilong Helt (NDoH) i bin opim namba wan laboretori bilong drag risisten TB insait long kantri, long Fonde Mas 24, 24 March 2016.

NDoH, i opim dispela hai kwaliti laboretori long mekim luksave bilong Wol TB De long dispela yia. Dispela bai helpim ol save lain bilong helt long painim aut ol binatang bilong sik Drag Risisten TB insait long kantri yet na ol i no inap go moa long ovasis.

Seketeri bilong Helt, Pascoe Kase husat i bin mekim bikpela toktok long dispela de i bin tok olsem, dispela em i wanpela bikpela de bilong tingim insait long histori bilong Papua Niugini.

"Dispela de i makim wanpela traipela lek mak we pablik sekta i mekim long wok bilong strongim save na we bilong wok insait long helt dipatmen yet long wokim tes bilong dispela strongpela kain TB long ol sikman na meri.

Dispela bikpela hap bilong TB kontrol long sekim na monitarim wok bilong TB marasin long ol sikman na sikmeri." Mista Kase i tok.

TB em i stap yet olsem wanpela bikpela birua bilong pablik helt long kantri. TB em wanpela sik we



Helt Seketeri, Pascoe Kase i katim ribon long opim nupela hai kwaliti drag-risisten leboratori. Poto: Wol Vision komyunikesen.

em i save kilim i dai planti bikpela man na meri long PNG i winim ol narapela kain sik.

Long toktok bilong Wol Helt Ogenaisesen i tok, namba bilong ol lain i kisim sik TB insait long PNG em i stap antap tru insait long Westen Pasifik rijon na em i namba 10 kantri long wol i gat bikpela mak namba bilong ol pipel

i gat dispela sik.

Dispela hevi i go bikpela moa wantaim narapela strongpela kain TB we ol i kolim drag risisten TB we em i save bikhet long ol nomol marasin na i save hat long daunim. Dispela kain TB i save nidim moa strongpela marasin long tritim na sikman bai kisim marasin i go longpela taim moa winim taim bilong

praimer i sik TB. Man o meri husat i kisim drag risisten TB bai kisim tritmen i go inap long tupela yia na i no sikpela mun olsem praimer i sik TB.

Sekim na lukim binatang bilong drag-risisten TB hariap inap long mekim rot bilong kisim TB tritmen hariap long stopim dispela binatang long kalap i go long narapela lain. Planti pipel i save dai bikos, ol i no save sekim binatang hariap na kisim marasin long stopim.

"I gat bikpela kost na taim bilong wet i save kamap long salim ol tes bilong binatang i go ausait long kantri.

Olsem na dispela nupela laboretori bai sevim planti mani, taim na ol samting bilong wok na taim long gavman i ken yusim long ol narapela samting bilong tritmen na ke bilong ol pipel husat i gat binatang pinis bilong praimer na drag-risisten TB," Mista Kase i tok.

Gavman i save tromoi mani long mak bilong K860 long wanpela hap spet na K250 antap long transpot bilong 35 spet bilong ol lain i sekim ol binatang bilong sik TB, taim ol i save salim i go long leboratori long Brisbane, na Australia.

Dairekta bilong Sentral Pablik Leboratori, Dokta Evelyn Lavu, i tok wok long PC3 leboratori i bin stat long Erpil 2014 na ol i pinisim long dispela mun wantaim olgeta WHO gaidlain na intenesenel standet o mak bilong ranim kain leboratori olsem.

Kantri Dairekta bilong Wol Visen PNG, Mis Heather MacLeod i tok amamas long gavman long putim mani i go long kirapim dispela PC3 Leboratori.

"Kain nupela wok olsem i save strongim helt sistem long mekim gutpela sevis longpela taim na em i strongim moa sastenebel development bilong kantri," Mis MacLeod i tok.

Ol narapela ogenaisesen olsem WHO, Australia Dipatmen bilong Foren Afeas na Treid (DFAT), Medicine San Frontiers (MSF), na Wol Visen i bin sapotim gavman long ol wok bilong strongim leboratori diagnosis long kantri.

25 meri Manus i sindaun long bisnis woksop

OL MERI nau i wok long kisim ol trening na save long ranim ol kain wok olsem ol liklik bisnis, long helpim ol i kamapim gut laip na sindaun bilong ol, family, komyniti na kantri.

Long Manus provins, 25 meri i bin sindaun long tripela woksop na pinisim kos long bisnis developmen.

Australia gavman aninit long fanding em i save givim long Provinsel na Lokol Level Gavmanens Program na wok patna wantaim Manus Provinsel gavman i sapotim na helpim dispela woksop.

Ol meri i bin sindaun long Beginners Entrepreneurship

Workshops loing kisim save long seils, maketing, bisnis plening, seivings na lon na humen risos menesmen.

28 man i bin sindaun tu wantaim ol meri long kos na kisim ol geta lain i bin sindaun long dispela tripela de bisnis trening woksop i go long 53.

19-pela em ol yut.

Long opening bilong woksop, Fes seketeri bilong Australia Hai Komisn, Simon Roz, i bin tok dispela trening i givim sans long groim bisnis long ol lain i bin sindaun long en.

Em i bin tok ol meri i gat sasn lonf kamap ol gutpela bisnis lain na kamapim ol wok bai sapotim ol komyniti bilong ol.

"Ikonmik developmen bilong ol meri long Manus em i bikpela samting we gavman bilong Australia i lukluk long en insait long Manus Provins.

"Dispela trening bai strongim

ol meri long fomel na infomel wok bisnis na kontribut gut long developmen bilong provins, "Mista Roz i tok.

Jacklyn Campbell, i mama bilong rile stet o haus bisnis i tok dispela woksop i skruim save bilong em long seivings na mekim mbisnis bilong em i gro.

"Taim mi mekim bisnis bilong mi, mani mi kisim mi save troim nabaut long ol narapela samting na i no long wok bilong menesim bisnis insait long ol wan wan de.

"Olsem na planti taim, mi nogat mani long lukautim bisnis bilong mi.

"Taim mi harim olsem bai dispela kain kos i kamap, mi bin rijstaim nem bilong mi na mi sindaun. Mi lainim planti nupela

samting na bai mi prektisim ol long groim bisnis bilong mi," Jacklyn i tok.

Deputi Provinsel Edministreta, Paso Pohei i luksave long Gavmann bilong Australia long sapot em i givim long ol bisnis trening woksop em i givim i go long provins, stat yet long 2014.

"Ranim bisnis i gat planti salens na ol strongela pip[el tasol bai go het ranim bisnis, maski ol salens i stap taim ol i karimaut ol bisnis," Mista Pohei i bin tokim ol lain i sindaun long woksop.

Institut bilong Benking na Bisnis Menesmen (BBM), wanpela asples bisnis kampani i save givim sevis bai go het long helpim na givim edvais i go long bisnis developmen long Manus.

Nupela risos senta bai helpim gut ol Is Sepik meri

...Bikpela sapot bilong CWA

OL Meri long Is Sepik bai kisim planti gutpela samtnig, helpim na save nau bihain long opim nupela risos senta bilong ol.

Moa yet, ol meri i laik wokim bisnis.

Planti handet pipel i bin bung long dispela wik long ples Yekimbole long Is Yangoru Lokol Level Gavman insait long Yanmgoru-Saussia Distrik long lukim opening bilong nupoela risos senta we bai givim trening long ol bisnis meri o ol lain i laik karimaut ol wok bisnis na ol narapela laipskil olsem kuk, samap, florikalsa, na komesek fud faming.

Country Womens Association (CWA) long PNG na wok patna wantaim Queensland Country Womens Association bilong Australia i bin putim mani long wokim dispela risos senta.

Gethrude Andrias bilong Country Womens Association bilong PNG i tok ol i bin wokim wankain risos senta long Jiwaka Provins we nau polanti handet man na meri i kisim trening long en.

Em i tok ol Country Womens Associations (CWAs) long wol em ol i memba long Associated Country Women of the World (ACWW) we i stap nau long 87 krismas.

Misis Andrias i tok ol i sanapim dispela risos senta long sapotim strong ol meri long kamapim gut laip na sindaun bilong ol.

"Ol meri i mas kirap, mekim samting na strongim ol yet long sait bilong mani. Tingting bilong yumi i mas ran wantaim long global level na yumi bai sanap wantaim long bungim ol senis na ol wok developmen i wok long kamap insait long distrik na kantri," Misis Andrias i bin tok.

Sir Eksekutiv Opisa bilong Yangoru-Saussia Distrik Develop-



OL LIDA MERI: OL meri lida bilong Is Yangoru LLG long Yangoru-Saussia Distrik long taim bilong opim risos senta.



BUNGIM BIKMERI WOL LIDA: Presiden bilong Is Yangoru LLG, Jeffrey Wafi i bungim Presiden bilong Associated Country Women bilong World, Ruth Shanks taim ol arapela distrik lida i lukluk i stap.

men Atoriti, Fantson Yaninen, husat i bin go pas long opim dispela risos senta long kisim ples bilong Mlnista bilong Tred, Komes na Industri, Richard Maru, i bin tok amamas long wok bilong Country Womens Association, na i bin tok promis long sapot bilong distrik long lukim olsem operesen bilong senta i ran gut.

Distrik im bin givim sponsa mani inap long K20,000long lon-sim nupela risos senta ya.

Mista yanien i tok gutpela wokbung na wok pren bai kamapim ol gutpela samting insait long disttik we ol narapela i kien lukim na bihainim, bai wanpela ki fokas aninit long lidsasip bilong Minista Maru.

"Minista Maru, Yangoru-Saussia DDA we i karamapim 4-pela dLLG presiden bai mno inap stop long kamapim gut wok pren long

kamapim gut na helpim ol pipel bilong Yangoru-Saussia Distrik", Mista Yaninen i bin tok.

I gat bilip olsem dispela senta bai givim trening i go long 6,000 meri na 2,0000 man long sait bilong somap, beking, kuk na ol arapela eria long statim ol liklik bisnis.

Mista Yaninen i tok Yangoru-Saussia Distrik i go insait long wok patnasip we i kamapim planti senis long developim distrik olsem; em i wanpela distrik tasol insait long Is Sepik Provins we i sainim tok promis wantaim Bikpela (God), kamapim ol wok long Sivil Woks aninit long wok bung wantaim Woks Dipatmen na implimentesen, patna wantaim PNG Kakao Bot long distrik i planim kakao olsem mein komoditi bilong ol, i gat benking na Fainens long helpim ol liklik SME insait long distrik aninit long

Pipols Maikro Benk, patna wantaim Ox-Fam na Water Aid long go hetim ol Rurel Wara saplai projek na wokim rurel ilektrifikesen long wok patna wantaim PNG Power.

"Mipela i redi long welkamim CWA na patna wantaim em long ksamsapim gut laip na sindaun bilong ol pipel bilong yumi," Mista Yaninen i tok.

Em i tok distrik i redi tasol long kamapim wok patna wantaim AusAID long givim trening long sait bilong go hetim strong ol SME.

Long wankain taim, Presiden bilong Associated Country Women bilong World, Ruth Shank i bin autim bikpela tok tenkyu i go long Mista Maru long sapot na gutpela pasin long lukautim ol na i skruim tok i go moa long tok olsem sapos em i no givim sapot bilong em, dispela samting ol i bin stap long en i no inap long kamap gut.

Misis Shank i bin amamas tru long gutpela welkam we ol pipel bilong Yangoru-Saussia i bin givim i go long delegesen bilong em taim ol i bin go kamap long opim risos senta.

Delegesen i bin amamas tru long gutpela welkam wantaim ol tumbuna danis na karim ol olsem ol VIP wantsaim ol sia ol i wokim long timba na bilasim wantaim ol flawa long 100 mita longwe i go long ples bilong wokim opening seremoni.

Em mi tok kirapim dispela risos senta em long givim ol trening na save bai mekim komyniti i kamap gutpela moa.

"Namba wan samting em kamapim gut famili, bihain komyniti na bihain, mekim PNG i gutpela ples long stap long en," Misis Shank i tok.

Stori na Wok wantaim Elizabeth Cox

Skruiim i kam long las wik.

Ekstensen

Karim Wok Na Stori i Go Aut Long Helpim Ol Pipel

Toksave: Ol dispela stori bilong wok gaden na gutpela kaikai i bihainim wanpela rot tasol long painim na kamapim gutpela sidnaun. Sapos yumi kisim dispela tingting na save, i no gutpela sapos yumi wan wan tasol kisim na holim i stap.

Yumi mas helpim ol narapela manmeri long ples na ol narapela grup na ples tu. Ol grup bilong ol meri i gat wok long helpim ol yet, na ples komyniti na skul wantaim.

Nogut yupela wan wan meri i klia na wokim dispela wok i go long gaden na haus bilong yu na ol narapela man i no save o i no klia, na yu no traime na skulim ol.

Sapos yu klia long wok nutrisen, helt na ol nupela we bilong wok gaden, tasol olgeta narapela man i bihainim we bilong bipo, bai i gat hevi i stap yet long ples bilong yu. Em i wok bilong yu long traime na helpim ol long stretim.

Ol Meri Inap long mekim wanem?

Taim yu wokim dispela wok o progrem bilong wok gaden na nutrisen insait long ples bilong yu yet yu mas traime hat tru long wokim gut wok wantaim ol narapela manmeri long ples.

Ol dispela nupela aidia bilong wok gaden na kuk bai karim tru kaikai na kamapim gutpela nutrisen o strongpela manmeri sapos plant man i bilip na kisim gut tingting na wokim wok wantaim.

Dispela 'klia tingting' i no inap kamap kwik tumas, na i no inap long kamap sapos ol manmeri i no klia pas-taim long as bilong dispela wok.

Em i wok bilong ol meri long helpim kliaim tingting long ol wantok long wanem sik bun nating i stap o long wanem kaikai i no save kamap gut long gaden.

Ol manmeri bilong ples i no inap senisim pasin o tingting sapos ol i no klia long dispela samting.

Em wanpela hap long ekstensen wok. Narapela hap em i olsem yupela ol meri husat i klia na i save mas traime na wok wantaim ol laini laik save long dispela nupela wok na tingting.

Yumi mas traime na helpim ol. Yumi noken les o tingting tasol long sindaun bilong yumi yet. Dispela em i wanpela bikpela tingting. Sapos yu bilip olsem dispela ol aidia bilong wok gaden na kaikai gutpela kaikai i ken helpim ples na pipel bilong yu, orait, yu mas strong long winim tingting bilong ol.

Sapos liklik group bilong yu i kamapim pinis gutpela gaden.

Orait, traime na singautim ol man na meri long wanpela de long soim ol we bilong wokim, na we bilong yusim gut ol kaikai i kamap long en.

Larim Jisas i go insait long laip bilong wan wan

...Moa long 7,000 bihainim Diwai Kros wokabaut



STORI TASOL
wantaim
Fr Paul Liwun

DONKI BILONG PAM SANDE

LAS wik tasol yumi selebretim Holi Wik na Ista.

Holi Wik i stat long Pam Sande. Yumi tingim Jisas i go insait long Jerusalem olsem King.

Em i no namba wan taim em i go long Jerusalem. Planti taim em i go pinis. Tasol long Pam Sande em i go gen olsem bikpela King.

Yumi ritim stori olsem em i go insait long Jerusalem, sindaun antap long wanpela yangpela nupela Donki. Na planti manmeri i welkamim em wantaim bikpela singaut olsem em i King bilong pikinini David. Planti i welkamim em wantaim lip bilong pam, olsem na yumi kolim Pam Sande. Planti i putim laplap antap long rot na Donki i karim Jisas i wokabaut antap long em.

Donki i amamas tru bikos ol manmeri singsing na soim bikpela rispek long em. Em i tinting olsem: "Oh, tude manmeri i gutpela tru. Ol i amamas na singsing soim rispek bilong ol long mi. Ol i no wari long klos bilong ol. Ol i putim antap long rot na larim mi wokabaut i go. Ating ol i rispektim na amamas long mi bikos mi nupela, i no bin karim wanpela man o wanpela samt-ing bipo". Donki i wokabaut praud stret.

Sampela de bihain, dispela Donki i go bek gen long Jerusalem. Tude em i no karim man o wanpela samt-ing. Em i wokabaut wantaim narapela Donki, em i pren bilong em.

Taim emi kamap long Jerusalem, emil painim aut olsem planti manmeri i stap. Olgeta i bisi long wok bilong ol yet. i nogat wanpela man o meri o pikinini, i lukluk long em. Olsem na dispela Donki i no amamas stret. Em i pilim bikpela bel hevi tru. Em i klostu krai bikpela tru. Ai wara i pulap long ai bilong em.

Olsem na em i tanim na lukluk long pren bilong em na i tok: "Pren bilong mi. Aste tasol mi bin kam long dispel Siti Jerusalem. Na mi pilim amamas tru bikos olgeta manmeri na pikini i kam na welkamim mi. Ol i singsing na danis amamas tru long welkamim mi. Stat long pikinini i go inap long lapun manmeri, olgeta i mekim gut long mi stret. Tasol, tude i narakain stret". Na wantaim liklik krai em i tok gen; "Bilong wanem ol manmeri i save lus tingting hariap long mi? i nogat wanpela i luksave long mi moa. i nogat wanpela i tok gutde long mi". Na em i skruim krai na draim aiwara bilong em.

Taim em i stop krai liklik, pren bilong em i tok: "Pren! Long laip bilong yumi antap long dispela graun, sapos YU i NO STAP WANTAIM JISAS, YU EM i SAMTING NATING YA! YU NOGAT MINING, SAPOS YU i NO STAP WANTAIM JISAS".

- Noken soim antap pasin olsem Donki. Ol manmeri i no singsing amamas long em, ol manmeri i singsing amamas long Jisas i sindaun antap long beksait bilong em. God i yusim yumi olsem DONKI, olsem instrument bilong em long karim Jisas i go long narapela.

- Manmeri bai amamas long yumi sapos Yumi stap wantaim Jisas oltaim.

LARIM Jisas i go insait long laip bilong yupela na kisim ol samt-ing i go insait long prea, Katolik Asbisop bilong Pot Mosbi Asdaiosis, Asbisop Joihn Ribat i bin tokim moa long 7,000 Katolik na ol arapela Kristen i bin stap insait long Gut Fraide Wokabaut bilong Diwai Kros las wik Fraide.

Em i bin wokim dispela toktok long taim ol i pinisim samtign olsem 5-pela awa wokabaut we i bin stat long 4 kilok bikmoning Fraide long Sen John's Katolik Peris, Tokarara i go olsem long Don Bosco Teknikel Institut long Taurama, Nesenel Kapitel Distrik.

Ol yangpela, ol liklik pikinini, ol mama sampela wantaim ol liklik bebi, ol lapun, sampela disebol, ol kalabus manmeri, ol rilijes, ol Katolik na ol arapela Kristen i no bin wari, tasol ol i wokabaut, pre na singsing long 5-pela awa long bihainim 14-pela stesen o rot bilong Kruse long tingim pen na dai bilong Jisas moa long 2,000 krismas i go pinis.

Moa long 20 krismas nau, ol Filipino misineri Pater na ol Sister i bin statim Rot bilong Kruse wokabaut long Mosbi nan au em i kamap olsem wanpela bikpela samt-ing olgeta Ista taim. Na olgeta yia, moa Kris-

ten lain i save joinim wokabaut.s

Long dispela yia, tu-pela eksen i bin kamap we wanpela man na meri i bin kisim bagarap.

Wanpela i bin kamap Foa Mail trefik lait we wanpela kar i bin draiv i go long ol pipel i stap insait long Diwai Kros wokabaut na long nara-pela, ol polis husat i bin woikabaut wantaim ol Diwai Kruse wokabaut lain long givim sekyuriti i bin stopim wanpela Toyota lenkrusa long kamapim eksiden.

Sampela lain i bin stap long wokabaut i tok ol lain i draivim kar i bin spak.

Dispela em i namba

wan taim long birua i kamap long Gut Fraide Diwai Kros wokabaut long Mosbi siti.

Pastaim politisen nau i stap long kalabus long Bomana, Paul Tienstein, i bin stap tu long dispela wokabaut wantaim sampela arapela kalabus manmeri long dispela Guit Fraide wokabaut.

Mista Tienstein i bin tok em i bin tanim bak-sait long Bikpela na olsem, em i stap long kalabus, tasol em i tok nau stap bilong em long hap i mekim em i glasim laip bilong em na senis.

Long wankain taim, ol wan wan Katolik peris insait long Mosbi i bin statim ol lotu bilong

Holiwik stat yet long las wik Tunde i go long Holi Fonde em wasim biloong lek na laspela kaikai o Las Sapa, Rot bilong Kruse long Gut Fraide we ol wan wan peris i bin wokim Rot bilong Kruse long ol sios bilong ol, na misa lotu wantaim.

Long Sarere nait, ool sios i bin wokim Ista nait vijil o Misa Lotu we planti bikpela manmeri na ol liklik bebi wantaim tu ol sampela liklik mangi i bin kisim Sakramen bilong baptismo.

Kain ol bikpela de olsem i save strongim tu bilip bilong planti manmeri long dispela kantri na wol.



OL YUT: Sampela yut namel long planti i bin wokabaut.



GLASM NA SENIS: Pastaim Pomio MP Paul Tienstein husat i stap nau long Bomana Haus kalabus i wokabaut tu long Gut Fraide Rot bilong Kruse wokabaut.



TREFIK KONTROL: Wanpela trefik polis i bin kontrolim Gut Fraide wokabaut.

Yumi mekim ol wok redi bilong nesanel ileksen

ILEKTORAL Komisn i mekim ol wok bilong redi nau long nesanel ileksen bilong kantri neks ya, 2017. Dispela ileksen i save kamap long faivpela ya na em i wanpela bikpela wok tru bikos em i taim bilong votim ol nupela lida bilong palamen.

I mas gat ol wok redi i kamap nau long wan wan provins.

I mas gat wok redi i kamap long stretim gut ol ilektoral rol, makim na givim skul long ol ilektoral opisa ol ritening opisa, ol lain bilong kaunim vot na ol arapela opisa husat bai stap insait long wok bilong ileksen.

Nupela sif ilektoral komisina bilong PNG em i wanpela senia pablik sevan husat i save gut long wok bilong pablik sevis na gavman.

I gat ol eksperiens ilektoral opisa i sambai tasol long helpim em long mekim ol wok bilong ileksen. Tasol bai i gat planti salens tru i kamap.

Wanpela bikpela salens tru em baset o mani bilong ranim dispela ileksen.

Nesanel gavman i givim mani em i ting bai inap long ranim dispela nesanel ileksen.

Ilektoral Komisn i givim baset bilong en tasol nesanel gavman i katim mak bilong mani ol i askim long en. Olsem na bai i gat ol hevi i kamap.



Nem bilong mi em, TA PE MEA SURE, ino TAPE MEASURE!! Hamas ileksen nau, yupela save paulim nem bilong mi!

Eh sori tru! Sistem i save paol liklik..Em i save ritim long inglis tasol...

Jada 016

Lojistiks o rot bilong karim ol i go long ol ples longwe i save winim 17 bokus na wokman bilong kisim vot kaikaim bikpela mani tru long krismas na bai inap long vot.

taim bilong ileksen. Dispela hevi i save kamap oltaim we ol ileksen i kamap. Narapela hevi em wok bilong ol sekyuriti.

I mas gat inap mani long baim ol polis na ami na ol narapela lain i mekim wok bilong sekyuriti long taim bilong ileksen.

Tasol namba wan bikpela wok tru em long stretim ol komon rol bilong wan wan ilektoret. Dispela ol buk i gat nem bilong ol manmeri husat inap long vot.

Ilektoral Komisn i save tokaut long ol pablik i go sekap long nem bilong ol long dispela buk na ol i ken stretim gut ol nem na redi long ileksen.

Tasol planti manmeri i no save go sekap long nem bilong ol.

Ol i stap nating inap taim bilong vot na sampela taim kros i save kamap bikos nem bilong ol i no stap long buk.

Bai i gat tu ol yangpela manmeri husat i winim 17 krismas na bai inap long vot.

Planti bilong ol i no gat nem long komon rol bikos ol i bin liklik manmeri long las ileksen.

Ol dispela lain i mas kamap na putim nem long ol komon rol nau sapos ol i laik vot long 2017 ileksen.

Long dispela nesanel ileksen tu, bai i gat sampela tok klia i mas kamap sapos ol pipel i ken yusim NID kat tasol long vot o i mas gat nem bilong ol i stap tu long ilektoral rol.

Dispela nupela program bilong NID kat tu i paulim planti moa manmeri long kantri.

Na tu, ol i no raun long olgeta provins na distrik insait long kantri yet long kisim nem na givimaut ol dispela kat.

Bai i mas gat bikpela wok bilong givimaut pablik infomesen i mas kamap bipo long nesanel ileksen i kamap.

Ol redio na niuspepa na televisen wantaim sosel media na ol arapela grup long komyuniti i mekim wok bilong autim ol dispela bikpela tok save bilong Ilektoral Komisn.

I kam inap nau Ilektoral Komisn i save wok gut wantaim ol nius lain long autim ol ripot na sampela arapela bikpela tok save long taim bilong ileksen.

Yumi hop dispela gutpela wok bung bai i go het yet long 2017 nesanel ileksen.

Ista i taim bilong spak, pati? ... yu skelim

LONG dispela taim planti manmeri no tingting tumas long skelim wanem samt- ing ol i tingting na mekim.

Sapos tingting i kirap long mekim wanpela samt- ing ol i mekim tasol.

Long dispela Skelim tingting i min long wanpela i no tingting long stap bilong narapela taim em i mekim samt- ing, sapos em i praivet o samt- ing bilong narapela man. Ol i save mekim tasol. Dispela wik em Holi wik, wik bilong malolo na tingim bek pen, dai na kirap bek long dai bilong Jisas.

Long dispela as sapos em i Krismas o Ista o wanpela pablik holide, em i no de bilong stap nating, nogat.

Long Papua Niugini, ol gutpela pasin bilong sin-



daun na tingim ol kain bikpela de i pinis.

Planti manmeri, sapos wanpela i go raun, bai lukim ol i pilai kad, dring bia na spak.

Sampela bai tingim Ista olsem de bilong soklet, kala kiau na ol arapela samt- ing.

Tasol yumi i skelim Ista, Holi Wik na Ista i min wanem samt- ing?

Long Kristen kalenda, Ista i bikpela de bilong ol bilip

manmeri.

Em i de, Jisas i inapim wok ridima plen bilong God Papa.

God i no laik manmeri em i mekim i lus long han bilong papa bilong giaman, satan. Nogat.

Em i laik soim satan olsem maski, satan i giamanim namba wan manmeri, Adam na Eve, God i gat strong long bringim ol manmeri long go bek long kingdom bilong em.

Na wanpela rot long lukim em long salim pikinini bilong em Jisas i karim pen, dai long diwai kros na winim dai gen bihain long namba tri de.

Yes long Papua Niugini taim yumi daunim yumi yet bai yumi ken save tru long

mining bilong Ista na ol arapela bikpela de olsem Krismas.

Ol lapun na ol bikpela manmeri i save long mining bilong kain holide olsem.

Tasol taim i senis na ol yangpela i no kisim gutpela skul we ol i mas kisim long tingting na amamasim tru mining bilong dispela ol de.

Na wok bilong skulim ol yangpela i stap long lapun, papamama, komyuniti na ol lidaman.

Sapos ol dispela bikpela lain i no mekim wok bilong ol, planti ol yangpela long dispela taim bai ting dispela ol bikpela de i de nating.

Long sait bilong Kristen, taim kain samt- ing sindaun i stap, planti bai lus long ridima plen bilong God.

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg

Pe bilong wanpela ya 52 niuspepa

| | |
|-----------------------|-------------|
| Ples: | Air: |
| PNG | K220.00 |
| AUSTRALIA | US\$110.00 |
| ASIA PACIFIC na JAPAN | US\$150.00 |
| AMERICA na EUROPE | US\$210.00 |

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Bihainim rot bilong kruse

PLANTI tausen Katolik manmeri na ol bilip manmeri bilong ol arapela sios tu long Mosbi i bin bung wantaim na wokabout long rot bilong kruse long tingim bikpela pen na hevi Jisas i bin karim long Gut Fraide.

Ol i stat wokabout long 4 klok moning long Sen John the Apostle peris long Tokarara na i go kamap long Don Bosco Teknikel Institut

(DBTI) long Boroko long 11 klok moning. Namel long ol lain i bin karim kruse, em sampela ol kalabus bilong Bomana Koreksenel Institusen.

Ol lain studen i helpim long kontrolim ol manmeri. Planti ol suster na pater na ol lain misineri i bin bung na wokabout wantaim ol bilip manmeri.

I bin gat 14 stesin bilong kruse we ol i stop na pre long tingim dispela wokabout bilong Jisas.

Ol peris insait long siti i bin lukautim ol dispela stesin na go pas long ol prea na singsing.

Ol studen husat i bin sindaun long trak wantaim ol maikrofon i bin go pas long beten korona na pre bilong Divine Mercy long taim ol pipel i wokabout.

Ol trefik polis i bin kontrolim trefik na ol i sambai arere long rot long stopim ol kar long brukim rot, tasol long Lahara sevis stesin

long 4 Mail, wanpela kar i spit i kam na bamim ol manmeri.

Wanpela man na meri i bin kisim bagarap na ol i karim tupela i go long haus sik.

Long taim dispela birua i kamap planti manmeri i pret tasol ol i strong yet na pinisim dispela wokabout i go kamap long DBTI.

Asbisop John Ribat bilong Pot Mosbi Asdaiosis i wetim ol i kamap na em i go pas long bikpela lotu bi-



Ol poto: Nicky Bernard

Bungim famili long Ista sofbal sempionsip



OL SISTA BUNGIM PES: Tupela SUSA long Wewak kam pilaiia sofbal long Mosbi long Ista wiken na bungim tupela susa bilong ol husat i stap long Mosbi. Long lep han Terryanna na long han sut Kimberly i bungim tupela kasen bilong tupela Juliet na liklik susa taim ol pinis pilai. Ol 4-pela i amamas long bung bihain long ol save harim nek long telefon tasol, dispela taim ol 4-pela i lukim pes na amamas bilong ol i bikpela moa yet.

Ol poto: Nicky Bernard

MI BUNGIM OL PIKININI MOSBI: Marie Seri long fran bilong Wewak tim i amamas wantaim ol Mosbi 2 long taim ol kisim malolo long pilai bilong ol. Marie wantaim man bilong em i kisim yangpela tim Wewak long kam pilai sofbal long Nesanel sempionsip we i kamap long Mosbi long Ista wiken.



Ol yangpela mangi i wokabout long rot long go lukim pilai. Ol tu i no save wanem pilai bai ol go lukim long taim bilong Ista wiken long wanem planti pilai i kamap long dispela longpela wiken.

Nicky Bernard i raitim

ISTA em taim bilong yumi ol-geta long tingim Yesu(Jisas) husat em i dai na kirap gen long baim sin bilong yumi.

Planti bilong yumi save ting olsem Ista em taim bilong amamas na kisim gut-pela malolo long wanem em pablik holide. I tru bai yumi amamas long wanem Jisas i kirap gen long dai long namba tri de.

Ista malolo planti bilong yumi save gat samting long mekim. Sampela bai go lotu, sampela bai gat pilai resis save kamap long dispela Ista malolo.

Long Mosbi Ista em wan-pela nomol pablik malolo long planti manmeri husat i no save bihainim buk tambu (Baibel). Na ol save kama-pim dispela Ista malolo long ol spoting kompetisen.

Mosbi bin holim tupela bikpela pilai long dispela Ista wiken. Sariti soka na Nesanel Sofbal Kompetisen we i kamap long Bisini pilai graun.

Sariti soka na Nesanel Sofbal resis i stat long wankain taim long Gut Fraide na pinis long Mande we fainal i bin kamap.

Long Gut Fraide, Mosbi Siti bin holim bikpela wok-about wantaim diwai kros we ol manmeri na pikinini i statim long 4-kilok moning long Tokarara na pinis long Don Bosco Teknikol Institiut long Is Boroko.

Planti manmeri na pikinini i wokabout na pinisim long DBTI we ol i bin kisim lotu long hap na bihain ol wok-about isi tasol na kamap Bisini we tupela bikpela pilai

bin kamap long hap.

Nesanel Sofbal resis i bin pulim planti manmeri na pikinini wantaim sampela tim i bin kam aut long ol narapela provins olsem Lae, Madang, Wewak na Hagen. Olsem pilai graun long hap i bin pulim planti sapota bilong ol dispela provins.

Planti famili bin go long sofbal long wanem sampela famili memba bilong ol i bin makim ol dispela provins na karim nem bilong provins ol stap long en na kam pilai.

Bisini sofbal graun bin pulap long ol sapota bilong Wewak tasol, tim Wewak i no gat ol bik nem pilaiia tasol taim ol pilai ol sapota save mekim planti nois long wanem planti bilong ol em yanpela manmeri.

Tim Wewak i bin opim ai bilong ol bik manmeri bilong sofbal asosiesen long wanem ol i liklik provins tasol na sofbal pilai i no stat longpela taim tasol ol kisim nem bilong provins bilong ol na kam pilai.

Taim tim Wewak kam tu long Pot Mosbi ol gat bikpela bas bilong NCDC i wetim ol long ples balus na kisim ol go long ples bilong slip na tu em karim ol go kam long ples bilong pilai inap ol klap long balus long Trinde na go bek long Gawi len.


Planti ol famili long Mosbi i bin go sapotaim ol na tu helpim ol long wanem ol lusim ples na kam long bikpela siti.

Tim Wewak i amamas tasol long pilai na soim ol Mosbi na narapela provins olsem bihain taim bai ol kam gut long Sofbal resis.



Ol manmeri husat i bin go raun na lukim Nesanel Sofbal Sempionsip long Bisini.

Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA

Tupela marit i stap insait long Morobe Provins

Bipo, bipo tru long Tumbuna taim i gat tupela marit i stap insait long Morobe Provins long wanpela ples ol i kolim Bukawa na dispela ples i gat bikples na ailan wantaim.

Tupela marit i save stap long bikples Bukawa ol i kolim Tikiland. Tupela marit i no gat pikinini olsem na tupela i lukautim rat na pusi olsem pikinini bilong tupela na ol i save amamas na stap long wanpela haus.

Ol i stap i go – i go na wanpela taim i gat bikpela kibung o krismas pat i kamap long ailan Bukawa na ol i laik i go long dispela krismas pati na ol i kisim bikpela kaikai long gaden na ol i slip.

Long moning taim ol i kirap na putim olgeta kaikai long banana bot na banana bot i pulap olgeta na i no gat spes. Spes i pulap olsem na tupela marit i tokim Rat na Pusi, yutupela kalap na i go pas, mitupela bai kam bihain, orait tupela Rat na Pusi i amamas nogut stret na tupela i kalap long bot na sel i go – go namel long solwara na Pusi i pilim ai slip na em tokim Rat, brata mi pilim ai slip ya, mi slip liklik pastaim.


Nau Rat i tokim Pusi em orait brata yu slip. Long dispela hap Pusi i slip na Rat wanpela tasol i pul i go – i go klostu long haus lain na em pilim bikpela hangre stret. Nau em i kirap isi tasol na stat long kaikai dispela banana bot i go inap long hap we bot i stat long sink na solwara stat long kam insait.

Pusi i pilim wara i tasim skin bilong em na em i kirap nogut na i bikmaus na singaut, tasol Rat i poret na swim i go pinis. Nau solwara i sinkim olgeta kaikai na Pusi i belhat nogut stret na swim baksait long Rat tasol Rat i go pinis long arere long solwara na go pinis insait long hul bilong graun.


Pusi i bihainim i go tasol em i no painim Rat. Rat i go hait pinis na em sotwin pinis na em i kisim win arere long solwara na dispela taim tupela marit i go kamap na tupela marit i askim Pusi long ol samting (kaikai) na Rat. Tasol Pusi i luk sori na em i stori long tupela marit long wanem samting Rat em i bin mekim namel long solwara.

Tupela marit harim dispela stori tupela i wari na belhat nogut stret. Nau olgeta tripela i stat long painim Rat long mekim save long em na kilim em i dai. Long dispela hap Pusi i kamap pren tru bilong tupela marit na em i save was long ol kaikai bilong ol olgeta taim, nogut rat bai kam kaikai gen.

Cathy Yomil



Ansa bilong Wod Pilai isu 2167



PAINIM WOD PILAI

- Ol wod lista:**
- | | | |
|-----------------|------------------|-------------------|
| LAITIM | PLAMA | TROMOIM |
| MANIMAK | RAUNABAUT | TOKNOGUTIM |
| AIGIR | MAIMBU | URE |
| BOGENVIL | NAMBAIM | WOKHAT |
| DRAIV | ODA | WOKABAUT |
| HADEN | PROFET | WELDOK |
| KOTIM | POTETO | YUMITUPELA |

S G S I C O I C V E R S Q M I W S X C K Z A G H D
A C O R T Q X N L C O D E U L E S N T C E C R O T
A I G I R T T G A I G R Y D L E T Q R F O A O N D
I P W I A B S N Z M A M M R A P L A M A I E I N E
R W N U I G E C G V B L A A X R F Y D F K M I M R
C V S Z T D D E G E X A N I N O E T B O I E L E I
F C B M I S T R K F S M I V W F L A P P E S T F A
K E E A M U L M O M K X M M E E C I V T T E S Q G
M N H M O L K O I O B G A K S T R E T I M K I T A
E U N B O A S T D I T L K E U U A C N E L G M T S
N E P U D W O L R A E I T A E D O L V S H N O M F
S B O U J K E R H P C H B S O J O K E D A I I K S
P G T D R W W K U D S A O S T S L M G T E E O C S
H M E R A J O T O K N O G U T I M N S P E C S H L
T O T O O W I K W U F S P Q V N L I Q C H A Z P E
X G O D E M B L A I T I M N D G I I I Q L I S C D
K V S T U E O R E B N A E Z R S A N M P N T K E G
O D S Y D I L I Y C A G O R I I L R O D S A J F N
H N D X A F P R M E O U R E E N Q C S E S V U A S
R R I G O O P T Y B T N T T S G G R I T T Y Y Z U



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Yut lida laikim ol Solomon yut i soim gutpela pasin



Yangpela meri Solomon Islands lukluk long kompyuta

Sam Seke i raitim

PRESIDEN bilong Honiara Yut Kaunsil, Harry Olikwilafa, i laikim ol yut i mas soim gutepla pasin insait long komyuniti.

Mista Olikwilafa i tok ol yut i no ken askim tumas long ol samting, tasol ol i mas wokim samting long helpim ol yet.

Mista Olikwilafa i tok olsem bihain long em i bin kam bek long Melanesian Indigenous Land Defense Al-

liance miting we ol i bin holim long Buala long Isabel Provins tupela wik go pinis.

Het tok bilong dispela miting em, "My Land May Future" i bin opim ai bilong ol yut long planti samting long sait bilong lidasip na divelopmen long Melanesia.

Mista Olikwilafa i tok sampela long ol samting i no gutpela long sait bilong divelo pemen ol i lukim em long Panguna main long Bogenvil.

Solomon Ailan pipel i laik lukautim 2023 Pasifik Gems



Em Pacific Games 2015 banner

Sam Seke i raitim

SAIT long gavman, olgeta long oposisen, ol spots oganaisesen, ol spot man and na meri long Solomon Ailan i sapotim bid bilong kantri long hostim 2023 Pasifik Gems.

Martin Rara, Presiden bilong Nesanel Olimpik Komiti long Solomon Ailan i tok olgeta i putim pinis bid o eplikesen long Pasifik Gems kaunsel long Janueri long hostim 2023 Pasifik Gems.

Narapela kantri we i putim bid long hostim 2023 Pasifik Gems tu em Frens Pasifik Teritori long Tahiti

we ol i bin hostim pinis tupela taim bipo.

Olgeta kantri olsem Fiji, PNG and New Caledonia i bin hostim Pasifik Gems tripela taim pinis.

Solomon Ailan i no hostim Pasifik Gems yet.

Long sapotim bid bilong Solomon Ailan, Praim Minista Manassesh Sogavare i tok kantri bai bildim wanpela spot stedium i kostim manimak inap long 277 milion Solomon dola.

NOCSI President Martin Rara i tok dispela em i bikpela samting long divelopmen bilong spot long Solomon Ailan.

Vanuatu i holim anti vailens mas



Ol pipel i mas agensim vailens long Port Vila

Caroline Tiriman i raitim

LAIN bilong Women Against Crime na Corruption i bin redim wanpela mas long soim wari long pasin em 7-pela man i bin mekim long paitim wanpela turis woka tupela wik i go pinis.


Nau bai yumi go long Vanuatu we tude long moning, moa long 700 pipel long Port Vila i bin mekim wanpela pisful mas i go long Palamen long givim wanpela petisen i go long Minista bilong Jastis long askim gavman long wok strong bi-

long stopim vailens agensim ol meri.

Ol dispela man husat i memba bilong ol bas na teksi bisnis i bin kisim nating na paitim Florence Lengkon long wanem em i bin mekim sampela toktok egensim long sosel midia.

Wanpela long ol pipel husat i bin stap long dispela mas em bisnis man, John Salong, i tokim Radio Australia olsem wari bilong vailens emi bikpela long Vanuatu olsem na ol pipel i laikim bai dispela kain pasin i mas stop.

PNG Katolik Sios i no wanbel long baset



Mani bilong Papua New Guinea

Caroline Tiriman i raitim

DISPELA tingting bilong gavman bai kamapim bikpela hevi tru long bringim helt sevis i go long ol pipel.

Katolik Sios long Papua Niugini i tok, tingting bilong Gavman long katim 50.7 milion Kina long baset em i save givim long Helt bai bagarapim tru olgeta wok em ol i save mekim long ol rurel eria, na kamapim bikpela hevi tru long ol pipel.

Plantu rurel helt sevis long kantri nau i stap aninit long han bilong Katolik Sios na tu ol narapela sios olsem

Luteran, Seven De Adventis na Yuinaitet Sios.

I gat liklik namba tasol long ol helt sevis istap aninit long wok bilong nesanel gavman.

Katolik Sios i gat 5-pela rurel haus sik, 244 helt klinik, 29 volanteri kaunseling na testing senta, wanpela nesing skul na 4-pela komyunuiti helt wok trening skul.

Father Victor Roche em Jenerel Seketeri bilong Katolik Bisop Konprens long PNG na Solomon Ailan i tok ol i no wanbel wantaim dispela tingting bilong gavman long katim baset bilong Sios helt Sevis long kantri.

Moa pipel sapotim protes mas



Florence Lengkon em sampela man i bin paitim em long Vanuatu

Caroline Tiriman i raitim

DISPELA mas em bilong soim tingting no laik long vailens egensim ol meri.

Ol pipel bilong Vanuatu bai holim wanpela peaceful protes mas long ol rot bilong Port Vila i go long Palamen haus tumora bilong soim wari long vailens egensim ol meri bihain long 7-pela man i bin paitim wanpela turis woka tupela wik i go pinis.

Sevenpela memba bilong ol bas na teksi draivai bin kisim nating na paitim Florence Lengkon long wanem em i bin mekim sampela toktok egensim long sosel midia.

Polis i sasim pinis ol dispela man tasol planti pipel long komyuniti i laik soim olsem ol i no laikim tru dispela pasin bilong vailens.

Lida bilong Women Against Crime na Corruption long Vanuatu, Jenny Ligo, i tok ol meri na ol sapota bilong gutpela lo na oda long kantri bai holim dispela pisful protes mas tumora long soim tingting no laik agensim vailens agensim ol meri.

Narapela samting em i mekim ol i laik mekim dispela protes em long pasin em wanpela man bilong

Solomon Ailan i bin kid-nepim tu wanpela Ni-Vanuatu meri na pikinini na bringim ol i go long Solomon Ailan we ol i bin stap inap lon 6-pela yia.

Tasol Jenny Ligo i tok dispela pasin em dispela 7-pela man i bin mekim long Florence Lengkon i mekim planti pipel long Vanuatu i toktok strong egensim vailens long kantri.

Lain bilong Wan Smol Bag i wanpela kampani i save mekim planti awenes long ol tieta wok bilong ol long tok klia long ol pipel bilong Vanuatu na Pasifik olsem pasin bilong vailens em i wanpela samting we i save kamapim hevi long ol famili na tu long ikononi na helt bilong ol pipel.

Donald Frank husat i wanpela ekta bilong Wan Smol Bag i tok em i lukim olsem planti samting i save mekim ol man i paitim ol meri na pikinini, na wanpela long ol em wari long planti pikinini tumas long famili, na no gat mani long lukautim ol dispela pikinini.

Florence Saga i narapela ekta bilong Wan Smol Bag. Mi askim em long tingting bilong en long dispela wari bilong vailens.

Fidel Castro tok bilas long raun bilong Obama

PAPA bilong Cuba, Fidel Castro i opim maus na autim tingting bilong em long dispela lukluk raun bilong Presiden Obama long Cuba las wik. Em i autim tingting bilong em long wanpela pas ol i bin putim long niuspepa bilong gavman, Granma.

Fidel i bin givim pawa bilong presiden i go long brata bilong em Raul, 10-pela yia i go pinis. Em i tok Cuba i no nidim ol presen i kam long han bilong 'empire'. Em i tok tu olsem ol toktok bilong Obama long stap wanbel gen wantaim Cuba, em i 'swit olsem suga' na i ken givim hat atek long ol pipel bilong Cuba.

Presiden Obama i bin tok olsem nau em i taim bilong lusim ting long ol hevi i bin stap namel long ol kantri long dispela hap. Tasol Fidel Castro i tok save gen long ol pipel long pasin Amerika i bin mekim long 1961 Bay of Pigs invesen, we ol lain Cuba husat i bin stap long Amerika i wok wantaim ol CIA na i traim long tekova



-Fidel Castro i tok ol toktok bilong Obama i 'swit olsem suga'.

long Cuba.

Fidel Castro i gat 89 kris-mas nau. Em i tokim Obama long skelim tingting tasol na i no ken ting em i save long politiks bilong Cuba.

Long taim Obama i lukluk raun long Cuba, em i bin kamap long televisen na toktok long ol pipel na i tok i gat hop long wok bung namel long Amerika na Cuba. Em i singaut tu long Amerika i mas rausim ol

tambu em i putim long treid wantaim Cuba. Dispela tambu i bin winim 54 yia nau na ol pipel i bin amamas na paitim han long taim ol i harim dispela toktok long maus bilong Presiden Obama. Dispela i wanpela bikpela samting i save kamapim bel pen namel long Cuba na Amerika tasol US Congress wanpela tasol i gat pawa long rausim dispela tambu.

Wol Kap i no bringim Zika long Saut Amerika

ZIKA virus i bin kamap long Saut Amerika wan yia bipo long 2014 Wol Kap reis long Brasil, ol saintis bilong Briten na Brasil i tok.

Dispela stadi bilong ol i rausim wanpela bilip em planti pipel i bin gat we i tok ol pipel husat i bin go long lukim Wol Kap soka resis i bin karim dispela Zika virus i go long hap.

Ripot bilong dispela wok painmaut bilong ol saintis i bin stap long wanpela Saiens jenel na i tok Zika virus i kamap long hap namel long Me na desemba 2013.

Dispela taim i longtaim tru bipo long ol keis bilong dispela virus long 2015.

Narapela bikpela bilip em ol lain husat i bin go long Wol Sprint Sempionsip kanu resis long 2014 i bin karim Zika virus i go long hap. Tasol ol saintis i tok dispela bilip tu i no tru.

Keis Zero

Wei bilong painim aut as bilong wanpela virus em i no isi.

Ol risetsa i mas glasm jenetik kod bilong 7-plea Zika sempol ol i kisim long Brasil.

Pastaim, ol i painim olsem



Wanpela mama na pikinini bilong em husat i kisim sik Zika.

olgeta virus i bilong wanpela famili, dispela i soim olsem wanpela man o meri i mas karim dispela virus i go long Amerika.

Dispela virus i stap nau long 34 kantri o teritori.

Zika em i wanpela virus na i save senis hariap tru. Liklik senis tasol i helpim ol saintis long kamapim famili diwai na traim tokaut wanem taim tru, tumbuna bilong ol i bin kamap long Brasil.

Ol saintis i ting dispela virus i kamap long hap bilong Amerika long namel ol pinis bilong yia 2013.

Profesa Oliver Pybus, bilong Yunivesiti bilong Oxford i tokim BBC olsem, 'Mipela i no save olsem

wanem tru dispela virus i kam insait long Amerika, tasol dispela virus i bin stap pinis bipo long Wol Kap i kamap long 2014.

'Mipela i lukluk long namba bilong ol pasindia husat i kam long ol kantri we Zika i stap pinis na husat i bin kam long Brasil na mipela i painim 50 pesen moa pasindia long dispela rot. Ating dispela i as bilong dispela sik i kamap ples klia nau.'

Dispela virus i kamap long Amerika i pas klostu long dispela kain sik i bin kamap long Frens Polinesia long 2013. Ol risetsa i tok i no gat sempol long ol kantri long hap bilong saut Is Asia long testim dispela samting ol i painim aut.

Bom kilim 69 pipel long Pakistan



Planti pipel i kisim bagarap sampela i kisim bikpela bagarap tru.

SAMTING olsem 69 pipel i dai na planti moa i kisim bikpela bagarap long taim wanpela bom i pairap long wanpela pablik pak long Lahore, biksiti bilong Pakistan. Ripot i tok planti ol famili i bin amamasim Ista i stap long dispela taim. Planti bilong ol lain husat i dai em ol meri na pikinini.

Ol polis i tok wanpela man bilong ol lain Taliban long Pakistan i bin pairapim dispela bom na kilim em yet wantaim ol arapela manmeri.

Presiden bilong Pakistan i mekim strongpela tok kros

long dispela kain pasin na em i makim tripela de bilong sori tingim ol lain i dai long dispela biru.

Dispela bom i bin pairap long geit bilong Gulshan - e-Iqbal pak long hap we ol lain i save putim kar na klostu long ples pilai bilong ol pikinini. Wanpela man i tokim TV stesin olsem em i wokabaut wantaim famili bilong em i go long pak long taim bom i pairap. Em i tok bikpela pairap i tromoi ol i go daun long graun na paia i sut i go antap long het bilong ol diwai na ol bodi tu


i flai i go antap.

Ol ami i kamap long dispela hap na helpim o polis long kontrolim ol pipel. Ripot i tok 193 pipel i bin kisim bagarap na ol haus sik i wok long helpim ol.

Wanpela han bilong Taliban ol i kolim Jamaat-ul-Ahrar i tokim ol nius lain olsem ol i bin pairapim dispela bom long ol lain Kristen husat i wok long amamasim Ista.

Lahore em i kepital bilong Punjab provins we ol mani lain i save stap na em i pawa beis bilong Praim Minista Nawaz Sharif.

Ol investigeta i opim iPhone pinis



Rizwan Farook na Tashfeen Malik i kilim 14 pipel long wanpela opis pati long Desemba 2, 2015.

Ol opisa bilong Federel Buro ov Investigesen (FBI) long USA i opim pinis wanpela iPhone na ol i no nidim helpim bilong Apple. Dispela i stopim wanpela kot keis ol i bin statim egensim Apple.

Ol FBI i bin kisim kot oda long mun Februari long Apple i mas raitim nupela program we inap helpim ol opisa long opim fon bilong Rizwan Farook. Rizwan Farook na meri bilong em Tashfeen Malik, i bin kilim 14 pipel long San Bernado long Desemba 2015. Bihain ol polis i bin sutim ol i dai.

Las wik ol polis i tok, 'sampela ausait lain i tok ol inap long opim dispela iPhone na ol i

no nidim helpim bilong Apple. Jastis Dipatmen i stopim kot keis na i painim ol arapela rot bilong opim dispela iPhone. Long dispela taim Apple i tok ol i no save long rot bilong opim fon na ol i laik gavman i tok save long ol long wanem kain rot i painim bikos em inap long bagarapim ol iPhone.

Long Mande, top federel prosekyuta long Kalifonia i tokaut olsem ol investigeta i kisim helpim bilong narapela lain, tasol ol i no tokaut husat tru i helpim ol.

Em i tok ol investigeta i promis long mekim ol wok painim bilong ol dispela lain husat i bin dai long San Bernadino.

Westpac Mobail benking em seif stret, tasol haitim PIN namba bilong yu

MOBAIL benking i save larim ol manmeri i kisim benking sevis long mobail pon bilong ol. Sapos yu wanpela kastoma bilong benk, yu bai no inap sanap long lain na yu bai no inap ran go long benk na mekim benking bilong yu.

Yu ken i stap long haus na mekim benking bilong yu. Tasol dispela nupela mobail benking sevis em i seif o no gat?

Taim yu laik mekim benking bilong yu wantaim mobail benking, dispela nupela we bilong mekim benking wantaim mobail pon em i seif stret.

Yu bai no inap karim i go i kam bikpela mani long mani paus long benk . Yu bai yusim mobail pon bilong yu sekim balens bilong mani i stap long akaun bilong yu, na yu i ken salim mani i go long akaun bilong narapela man o meri long mobail pon tasol.

Dispela em i seif we long mekim benking sevis i kamap isi. Bai yu sevim taim bikos yu bai no inap westim taim long ran i go long benk na sanap long longpela lain na wetim taim bilong yu long go lukim wok manmeri bilong benk long helpim yu.

Wantaim mobail benking, yu no nid long go long benk. Yu i ken stap long haus o gaden o stap long wanem hap yu i stap long en, na mekim benking long laik bilong yu yet.

Bikpela samting, yu no ken soim pin namba bilong yu long wanpela man o meri. Dispela em i seif we bilong mekim benking.

Tasol í no olgeta mobail benking aplikesen i stap long maket i seif. Sampela mobail benking aplikesen i no sief na i no save kamapim gutpela sekyuriti samting.

Westpac Benk i gat gutpela mobail benking teknoloji long lukautim gut ol kastoma bilong em husat i save yusim mobail benking sevis.

Westpac i save wok bung olgeta taim wantaim tupela mobail fon kampani long PNG long larim ol mobail trensek- sen bilong ol kastoma bilong em i stap seif na nogat wanpela manmeri bai lukim.

Bosman bilong Ritail Benking long Wetspac, Cameron Penfold, i tok sekyuriti sistem bilong Westpac mobail benking i gat pawa long sekim olgeta mobail beking trensek- sen i kamap.

“Ol kastoma bilong mipela i ken mekim mobail benking trensek- sen long laik bilong ol yet long wanem taim ol i laik mekim na wanem hap ol i stap, na dispela em i seif wei long mekim benking long mobail fon.



Mobail benking wantaim Westpac em i wanpela gutpela wei we ol kastoma i ken yusim dispela sevis long laik bilong ol yet olsem dispela wokmeri bilong Westpac i soim hia.

“Sistem bilong mipela i save haitim ol samting gut tru. Ol lain bilong stilim mani long mobail beking na mekim paul pasin long mobail benk i hat long mekim kain ol pasin no gut bilong ol. Sistem bilong Wetspac em i seif stert,” Mista Penfold i tok.

Mista Penfold i bilip strong olsem mobail benking sevis bilong Westpac em i seif stret tasol, em i laik toksave long ol kastoma bilong benk olsem ol i no ken soim ol mobail trensek- sen bilong ol long arapela manmeri.

Em i tok ol kastoma i mas haitim ol samting ol akaun namba, PIN namba na wanem samting ol i mekim long mobail benking trensek- sen.

“Ol benk i ken mekim ol samting long lukautim gut ol kastoma bilong ol, na ol kastoma tu i mas lukutim ol samting bilong ol yet taim ol i yusim mobail benking sevis,” Mista Penfold i tok.

“Ol kastoma i mas bihainim ol toksave na ol arapea tok- tok mipela i tokim ol. Sapos ol i harim na bihainim, ol bai abrusim bikpela sans bilong ol stilman i stilim mani bilong ol, na mani bilong ol bai stap gut tru long benk,” em i tok.

Long meking mobail benking i kamap seif:

- No ken soim PIN namba bilong yu long narapela man o meri. No ken tokim PIN namba bilong yu long narapela manmeri. No ken givim i go long ol wok manmeri bilong benk tu. Em i namba bilong yu yet na yu yet mas save na haitim dispela namba. Lokim dispela namba long tingting.
- Larim mobail fon bilong yu i stap gut. Sapos yu lusim o sapos wanpela man o meri i stilim mobail fon bilong yu, hariap tru toksave long Westpac long kol senta namba bilong ol 322 – XXXX.
- Kisim was na no ken wanpela man o meri i lukluk long wanem samting yu mekim long mobail fon bilong yu taim yu laik mekim wanpela trensek- sen long mobail fon bilong yu. No ken larim wanpela man o meri i lukim PIN namba bilong yu.
- Sapos yu ting wanpela man o meri i lukim PIN namba bilong yu, ringim *149# hariap tru, na senisim PIN namba bilong yu (Opsen X i stap long help menu)

Long kisim moa toktok, ringim Westpac Kol Senta long telepon namba 322 0888.

ANX Real Estate Brokers redi long salim haus

WANPELA nupela kampani ol i kolim ANX Real Estate Brokers i redi tasol long mekim bisnis wantaim ol manmeri o kampani husat i gat ol haus o propeti long salim.

ANX Real Estate Brokers i save kamap olsem namel man long helpim ol man o kampani i salim haus hariap tru long gutpela prais.

Wanpela maus man bilong ANX

i tok ol i save kamap olsem namel man long salim ol haus sapos wanpela papa bilong haus i laik salim haus bilong em.

“Mipela i save kamap olsem namel man. Mipela i save stap namel long ol baia na sela bilong haus. Sapos wanpela man i laik salim haus bilong em tasol em i painim ol baia long baim dispela

haus, mipela i ken kisim ol baia i kam na soim ol long dispela haus.

“Sapos wanpela man o meri i painim ol rent haus bilong rentim na slip, ol i mas kam lukim mipela. Mipela i redi long helpim ol papa bilong rent haus tu long edvetaisim rent haus bilong ol na pulim moa kastoma i kam insait,” em i tok.



Connecting PNG and the world.

Call toll free 180 3444 for more information.



No ken larim birua stap na arapela lukim - Bill Hill



Deputi Rejista Menesa bilong Basamuk Rifaineri, Bill Hill i givim salens long sefti sait.

James G. Kila i raitim

SAPOS yu lukim wanpela samting em i no seif, no ken larim i stap long arapela i kam bihain na lukim. Yu mas rausim na tingim sefti bilong yu yet na ol arapela.

Dispela em strongpela tok-tok Ramu NiCo Basamuk Rifaineri Rejista Menesa, Bill Hill i wokim long Tunde long taim em i givim toktok long makim opening bilong Nesenel Maining Sefti Wik bilong Ramu NiCo long Basamuk.

Ol selebresen bilong NMSW i bin kamap namba wan taim aninit long luksave bilong Nesenel Sefti Forum, em Nesenel Maining Sefti Kaunsil nau i surukim na mekim em i kamap olsem wik bilong luksave long olgeta maining operesen in-

sait long PNG. Dispela wik i save lukim ol selebresen i kamap long promotim helt, sefti na envairomen.

Mista Hill i tok yumi olgeta wan wan i mas soim gutpela pasin long lukautim yumi yet long sait long sefti na tu ol arapela i kam bihain long yumi.

"Yu mas lukautim sefti bilong yu, na tu tingim sefti bilong arapela wanwok o famili memba bilong yu oltaim," Mista Hill i tok.

Ramu NiCo stat long Tunde i amamasim NMSW long tupela operesen wok ples bilong en long Kurumbukari Main long Usinobundi distrik na Basamuk Rifaineri long Raikos distrik long Madang provins.

NMSW bilong Ramu NiCo (MCC) i stat long Tunde,

Mas 29 na bai pinis long Sarere, Epril 2.

Mista Hill i tok olsem yumi olgeta i save wok wantaim kain kain ol birua i stap oltaim long sait long helt, sefti na envairomen. Olsem na yumi mas gat gutpela tingting oltaim long pasin bilong yumi long sait long sefti long wok ples bilong yumi.

Mista Hill i tok long sait long maining na prosesing industri sefti i mas stap namba wan samting tru long olgeta wok.

Em i salensim olgeta wokman meri long yusim dispela NMSW olsem sans long lainim nupela samting na tu kisim nupela aida o tingting long bringim i go bek long wok ples na tu kisim i go long famili haus bilong yu.

PNG Air kamapim nupela kastoma sevis



Paul Abbot (namel) wantaim tupela kru bilong nupela ATR balus bilong PNG Air long Daru ples balus.

PNG Air i kamapim nupela kastoma sevis long tokim ol pasindia sapos ol flait bilong ol i kensel o em bai kamap bihain long sampela awa, Sif Komesal Opisa, Paul Abbot, i tok.

Mista Abbot i tok sapos wanpela flait bilong PNG Air i kensel o bai kamap bihain long sampela taim, PNG Air Kol Senta bai salim wanpela teks mesis wantaim sampela moa toktok long sait bilong flait i kensel o em bai kamap bihain.

"Pastaim mipela i save bringim ol kastoma bilong mipela tasol mipela i nau luksave olsem sampela ol pasindia i no save ansaim mobail fon bilong ol sapos

ol i lukim olsem nupela namba i ringim ol," Mista Abbot i tok.

Em i tok dispela nupela wei long salim SMS mesis i go long mobail fon bilong ol kastoma em i kamap gutpela we long larim ol pasindia i save sapos flait i kensel o bai kamap bihain long sampela minit o awa.

"Dispela nupela sevis i daunim sans bilong kamapim bikpela hevi long ol kastoma bilong mipela," Mista Abbot i tok.

Em i tok PNG Air i les long flait bilong ol pasindia i kensel o i kamap bihain long sampela minit o awa, na ol menesmen i wok hat long larim flait i bihainim plen na

kamap long taim stret.

"Tasol sapos sampela hevi i kamap, mipela bai hariap tru tok save long ol pasindia. Mi bilip olsem dispela sevis bai daunim mak bilong flait i kensel na helpim ol pasindia bilong mipela long plenim de bilong ol gut tru," Mista Abbot i tok.

Em i tok ol pasindia i mas putim mobail fon namba bilong ol long balus tiket taim ol i laik bukim sit bilong balus.

PNG Air Kol Senta bai yusim ol mobail namba bilong pasindia i stap long balus tiket na salim teks mesis i go long tok save sapos flait i kensel.

Kumul Petroleum laik kirapim moa LNG bisnis



Wapu Sonk i toktok long LNGSA 2016 bung long Singapore.

NESENEL oil na ges kampani bilong PNG, Kumul Petroleum, i lukluk long kirapim moa LNG bisnis long PNG, Menesing Dairekta, Wapu Sonk, i tok.

Mista Sonk i autim dispela toktok long LNGSA 2016 bung long Singaore long Mas 16, we em i bin toktok long sait bilong Kumul Petroleum i kamap olsem wanem long PNG oil na ges industri.

Mista Sonk i tok Kumul Petroleum i tingting long kirapim planti LNG bisnis long

bihain taim, na wanpela wei long mekim dispela em long kamapim join vensa patna (JVP) wantaim ol arapela biknem oil na ges kampani husat i laik mekim oil na ges bisnis long hia.

Em i tok Kumul Petroleum i gat ol rait long baim bikpela ekwiti sea long ol join vensa oil na ges projek long kamap olsem wanpela ko-vensa projek patna ol long petroleum developmen laisens (PDL).

"Mipela i wok long sekim

ol teknoloji long kamapim mini LNG bikos mipela i tingting long salim LNG i go aut long ovasis.

"Mipela i laik mekim ol eksploresen na developmen samting bilong oil na ges. Mipela i statim dispela pinis taim mipela i kisim ol developmen na ritensen laisens.

"KPHL i aplai long kisim laisen aninit long nem bilong em yet. Mi bilip olsem mipela bai kisim planti laisens na dispela bai helpim Kumul Petroleum long kirapim moa LNG bisnis.

Ol komyuniti i kamapim ol fiseris menesmen plen

I kam long WCS PNG Midia

TENPELA komyuniti long Tigak ana Tsoi Ailan Nu Ailan provins i bin statim wok wantaim Wail Laip Konsevesen Sosaiti Papua Niugini program bilong lukautim gut ol marin risos bilong ol long ol inap long stap longpela taim bihain.

Insait long Januери na Februери 2016, WCS Nu Ailan fiseris menesmen tim i holim 4-pela woksop insait long ol dispela komyuniti long kamapim ol fiseris menesmen plen.

Bikpela tingting bilong dispela ol woksop em long bringim ol komyuniti lida long kam na givim tok orait long ol menesmen rul o lo bilong menesmen insait long ol plen bilong ol.

Ol i tambu long ol kain wei bilong kisim pis we i save bagarapim ol pis na en-vairomen, pasim ol ples bilong kamapim ol kain kain liklik pis, makim liklik sais tasol, hap we tambu long kisim pis na wei bilong kisim ol enimal bilong wara na sol-wara long kain kain hap na i no long wanpela hap tasol. Dispela em sampela bilong ol nupela wei bilong fiseris menesmen wok we ples Tigak na Tsoi ailan long Nu

Ailan provins i wanbel long putim i go insait long fiseris menesmen plen bilong ol.

“Ol pipel long ples nau i wok long stat long lukim olsem em i gutpela long kisim pis long taim yumi nidim. Ol i wok long kisim klia tingting nau tu olsem sapos ol pikinini bai kaikai pis taim ol i gro ap, yumi mas lukautim wanem samting yumi gat nau,” wanpela viles elda bilong Maion viles, long Tsoi ailan i tok.

Kamapim ol menesmen plen em i wok bilong WCS na ol ailan komyuniti long ol helti marin risos insait long tupela yia.

WCS Fiseris Edvaisa, Dokta Sven Frijlink i tok long wan wan komyuniti, menesmen proposal em i toktok long ol gutpela samting bai kamap long ol narapela fiseris. Em i tok moa olsem wok bilong menesmen i stat wantaim taim bilong tok save long ol fiseris ikoloji na menesmen wok na bihain long luksave long ol lokal fiseris we i gat nem.

Ol narapela step insait long dispela wok em long holim ol grup toktok long wanem samting em i impoten long fiseris, sosio-ekonomik sevei na komyuniti sevei bilong ol kain menes-

men we ol i laikim bilong ol ki fiseris.

Pastaim long menesmen plen woksop i kamap, ol i holim wanpela taim bilong traime long kisim ol pis long ples. Ol risal bilong sevei i kamapim beslain bilong save klia long helt bilong fiseris na wanpela bensmak long skelim ol senis long bihain taim.

“Ol i kamapim ol nupela tingting long ol lain i ken save gut na mekim wankain wok insait long olgeta ples wantaim, na long wankain skel bilong sotpela taim na longpela taim,” Dokta Frijlink i tok.

Ol narapela menesmen wok em olsem long yusim ol masin bilong brukim ol kain kain pis i go long givim spes long narapela kain pis (FADS).

“Mipela i hop olsem FADS bai transfe long ol presa bilong kisim pis long ol rip we ol i save kisim pis tumas long en, na bai ol i ken go long hap we ol pis i no inap long pinis hariap olsem ol tuna na mekerel,” Dokta Frijlink i tok.

Olgeta menesmen plen bilong ol dispela ples bai redi long mun bihain na bai ol i lukluk gen long ol bihain long 5-pela yia.



Piksa bilong olpela menesmen plen we ol i bin kamapim wantaim komyuniti bipo.



WCS Fiseris Teknikal Edvaisa - Dokta Sven Frijlink i stap long wanpela woksop wantaim ol komyuniti long Kavulik na Ungakum long Tsoi Ailan long kisim tingting bilong ol long kamapim draf Fiseris Menesmen Plen.

Stori long klaimet senis wantaim dijital

I kam long WCS PNG Midia

WANPELA projek bilong helpim ol ruralkomyuniti insait long 5-pela provins insait long kantri bai stori long klaimet senis bilong helpim ol ruralkomyuniti. Tupela bilong ol dispela komyuniti i stap long Nu Ailan provins na ol i namba wan long pinisim wanpela midia woksop long stori long klaimet senis wantaim dijital.

Mani bilong wokim dispela em i bin kam long Yunaitet Nesens Developmen Program (UNDP) wantaim patnasip bilong Klaimet Senis Developmen Atoriti -CCDA (pastaim OCCD). Dispela em i wanpela bilong ol ektiviti we Wail Laip Konsevesen Sosaiti long PNG (WCS PNG) i kisim kontrak long ranim aninit long OCCD/UNDP Klaimet Senis Risiliens na Adaptesen projek.

WCS PNG bai givim edukesen na awenes matiriel bilong dispela projek we bai kisim stori bilong ol pipel long hevi bilong klaimet senis long laip bilong ol yet, wantaim ol posta na hap pepa bilong raitim ol toktok. Dsipela bai kamapim klaimet senis matiriel long sapotim nesanel skul karikula na

kamap bilong wanpela websait long kamap olsem nesanel hab o ples bilong holim ol stori bilong klaimet senis.

Long pinis bilong mun Februери i go long stat bilong mun Mas long dispela yia, WCS midia tim i holim wanpela dijital stori woksop long Kavulik naUngakum viles long Lavongai Lokal Level Gavman long Nu Ailan provins.

“Dijitel stori i bungim stori bilong wan wan man na meri long wanem samting ol i lukim na pilim long taim klaimet i senis. Mi olsem wanpela midia wokmeri, mi putim mi yet i go insait long wan wan stori bilong ol long wanem kain ol salens ol i save bungim. Em i tru stret taim yu go insait stret na kisim trupela stori long lewa stret, em ol pipel yet ya!,” Mis Elaine Vaina, WCS Midia opisa na trening tim lida i tok.

Mis Vaina i tok olsem planti rural komyuniti nau i stap as nating stret long ol hevi bilong klaimet senis, tasol ol i no gat save na strong na ol risos long helpim ol long tokaut long ol stori bilong ol yet.

Wei bilong yusim dijital long stori em i gutpela we i kamap olsem poroman bilong ol pipel na i no hat tumas long

ol i yusim. Husat man o meri i laik save long yusim nupela teknoloji long autim ol stori bilong ol long ol narapela lain, em i isi tru long mekim.

Ol stori bilong Kavulik and Ungakum viles em olsem 3 o 4-pela minit video wantaim toktok bilong ol, piksa, na musik long baksait. Wan wan man na meri i gat stail bilong ol yet long tokaut long stori bilong ol.

Wanpela meri bilong Ungakum viles, Rachael Pesat i makim olgeta lain long trening na i tok olsem planti bilong ol i traime long tokaut stret long wanem ekspiriens bilong ol long klaimet senis.

“Yumi planti i no save long yusim dijital midia long mekim stori. Dispela trening i skulim mipela gut. Mipela inap long tokaut long stori bilong mipela yet long wan wan de mipela i save stap long ples bilong mipela wantaim ol man bilong mipela, meri bilong mipela na ol pikinini insait long haus na komyuniti, wantaim ol piksa tasol,” Misis Pesat i tok.

Wankain trening bai kamap long ol ruralkomyuniti bilong Is Sepik, Noten, Madang na Morobe provins long ol mun i kam bihain.



Wanpela meri bilong Ungakum viles, Kalina Stanley i lukluk gut tru long Mis Vaina (putim ai glas) i soim long edit bilong klaimet senis stori.



Mis Vaina i toktok long sampela bilong ol lain bilong Kavulik viles husat i bin stap long trening.

Ol pilaia i brukim lo i mas lusim pilai graun

...kosa bilong Cronulla, Flanagan, i tok strong



KOSA bilong Cronulla Sharks, Shane Flanagan, i tok strong long ol pilaia husat i brukim lo insait long pilai graun i mas lusim ples bilong pilai.

Em i bin mekim dispela toktok bihain long pilaia bilong Melbourne Storms, Marika Koroibete, i mekim wanpela strongpela takol long pilaia bilong Sharks, Chad Townsend.

Sharks i daunim ol Storms, 14-6, tasol long 60 minit bilong pilai, Koroibete i mekim wanpela leit takol long Townsend long lek bilong em taim em i laik pilai bal.

Flanagan i gat bikpela askim, long wanem

ol i no rausim Koroibete taim em i bin bagarapim pilai.

Long wik i go pinis, pilaia bilong Manly, Martin Taupau, i kisim hai takol long senta pilaia bilong ol Sharks, Jack Bird, taim em i no bin holim bal. Taupau i stap insait long pilai graun yet, tasol ol i stopim em long pilai insait long wanpela wik na ol i tok olsem dispela panismen i no stret.

“Dispela kain takol em i no stret na long wanem astingting ol Storm i no skruim i go daun long 12 pilaia long pinisim gem,” Flanagan i tok.

Dutch futbol pilai, Johan Cruyff i dai



DUTCH futbol pilaia, Johan Cruyff, em i wanpela bikpela pilaia long histori bilong gem. I gat namba 68 krimas na i dai bihain long em i gat sik kensa.

Ripot i tok, ol famili bilong Cruyff i bin stap wantaim em long Barcelona long taim em i bin dai.

Cruyff i save smok planti na em i bin go long lewa operesen long yia 1991. Em i bin stap 6-pela mun bihain long ol i bin tokaut olsem em i gat sik kensa.

Cruyff em i wanpela namba wan futbol pilaia bilong ol Dutch we em i bin go pas long tim bilong em long strongim banis bilong ol

na kisim bal taim ol birua i holim bal.

Em i bin kamap wanpela namba wan pilaia bilong wol long ol 1970 taim em i bin winim tripela Yuropien Kap long yia 1971 inap 1973. Ol i bin kolim em Yuropien futbola bilong yia long 1971,1973 na 1974.

Ripot i soim olsem em i gat sampela moa rekot i stap.

Pilaia bilong Brasil, Pele, i tok, “Johan Cruyff em i wanpela bikpela pilaia na kosa. Em i lusim wanpela bikpela wok long famili bilong mipela long futbol. Mipela i lusim wanpela bikpela man.”

Broncos, Warriors na Eels i win

NAMBA foa raun bilong 2016 Nesanel Ragbi Lig sisen i kamap namba wan wantaim Brisbane Broncos na North Queensland Cowboys i statim pilai we tupela i bin resis long 2015 premiasip gren fainel.

Resis namel long Broncos na Cowboys i bringim planti lain long pilai graun long lukim gem bilong ol bikos tupela i bin resis long gren fainel na Cowboys i win wantaim wanpela poin. Tasol nau, skoa bilong tupela i senis, taim pilaia bilong ol Broncos, Anthony Milford, i kisim wanpela fil gol olsem ol Cowboys i bin mekim long las yia na ol

Brisbane i win.

Bulldogs i daunim ol Rabbitohs, 42-12 na ol Titans i karamapim ol Riders wantaim 4 poin we skoa i sanap olsem 24-20.

Sea Eagles i daunim ol Roosters, 22-20, Dragons i daunim ol Penrith, 14-12 na Warriors i daunim ol Knights, 40-18.

Parramatta Eels i strongim banis bilong ol strong we Wests Tigers i painim hat long kisim wanpela skoa. Eels i win wantaim 8 poin taim Tigers i no bin kisim wanpela poin.

Cronulla Sharks i pasim lsta wiken na lokim ol Melbourne Storms, 14-6.

Stail bilong Virat Kohli i kamap namba wan olgeta

...India rausim Australia long Wol Twenti20 kriket resis



PILAI graun bilong Wol Twenti20 resis i pulap long ol manmeri na pikinini na ol i singaut na tok “Kohli, Kohli, Kohli”, bikos em i wanpela stail pilaia bilong ol India, husat i

strong nogut tru na ol i daunim ol Australia.

Em i plen gut tru long olgeta taim insait long pilai graun na soim gut olgeta liklik stail bilong em na India i win wantaim 109.16 poin.

Ol Cambridge meri klostu i sink



OL Cambridge meri klostu i sink long yia Bot Resis i kamap namel long Cambridge na Oxford bikos bikpela ren i pundaun na bagarapim ples.

Ol piksa bilong resis long London i soim olsem bot bilong Cambridge i sink i go insait long wara taim Oxford i strongim pawa bilong ol.

Oxford i winim dispela resis long yia 2013 inap nau na dispela em i namba 4 win bilong

ol, na namba 13 win bilong ol insait long 17 yia.

Tasol, ol Cambridge man i daunim ol Oxford bikos ekspiriens kru bilong ol Cambridge i go pas taim ol i stat na wanpela i no abrusim em inap resis i pinis.

Ol Cambridge i winim wanpela gol medal na kosa bilong ol, Steve Trapmore, i tok ol i winim namba 8 gol medal bilong Great Britain insait long 2000 Olimpik.



Ramu NiCo amamasim NMSW wantaim naispela kala



Naispela pereid wantaim naispela kala i kamap long Basamuk Rifaineri.



BSK Deputi GM Operesens, Bill Hill.



John Benny long KBK Main i amamas long droim posta long NMSW.



BSK Esid Plent opereta Joshua Yawa i givim toktok long PPT.

RAMU NiCo Menesmen (MCC) Limited long dispela wik i amamasim Nesanel Maining Sefti Wik (NMSW) we i lukim ol sefti wok program i kamap long tupela operesen wok eria bilong em long KBK Main na BSK Rifaineri.

Ol program bilong NMSW i stat long Tunde, Mas 29 na bai pinis long Sarere, Epril 2.

NMSW em wanpela program we i save kamap olgeta yia we Sif Inspekta ov Mains Sekretariat long Mineral Risoses Atoriti (MRA) i kamapim long promotim sefti na gutpela pasin bilong wok na lukautim sefti bilong wokman na ol lo na polisi bilong kampani long kamapim 'Nogat Birua' long wok ples.

Ramu NiCo i luksave na amamasim NMSW aninit long hettok "Vehicle & Road Safety" na arapela hettok em, "Say No to Non-Compliance"

Dispela hettok i sut long rot sefti long taim ol man i draivim kar na tu pasin bilong lukautim kar bihainim stret ol lo long sait long trefik na tu long lukautim sefti bilong ol lain i stap antap long kar na ol lain i yusim rot.

Vais Presiden bilong Ramu NiCo Menesmen (MCC), Charles Zha husat i bin opim Ramu NiCo NMSW long Tunde i tokaut olsem Kampani i givim bikipela luksave long sait long sefti stendet na lo we i go wantaim sefti long lukautim laip bilong ol wokman na ol masin na ol arapela samting bilong kampani.

Ol selebresin bilong NMSW i bin kamap aninit long luksave bilong Nesanel Sefti Forum, em Nesanel Maining Sefti Kaunsil nau i surukim na mekim em i kamap olsem wik bilong luksave long olgeta maining op-

eresen insait long PNG. Dispela wik i save lukim ol selebresin i kamap long promotim helt, sefti na envairomen.

Ramu NiCo KBK Main Menesa, Sarimu Kanu i tok gutpela wok long sait long sefti i mas kamap long wan wan wokman long wan wan wok ples bilong ol. Em i no ken kam long autsait o taim ol supavaisa o menesa i toktok.

Mista Sarimu long toktok bilong em long taim bilong opening bilong sefti wik i tok olsem sefti bilong ol kar na rot sefti lo em bikipela salens tru long Kampani long sait long bikipela fainensel hevi na i ken givim hevi husat bikipela indastri olsem maining tu wantaim.

Ramu NiCo Basamuk Rifaineri Rejista Menesa, Bill Hill i tok yumi olgeta wan wan i mas soim gutpela pasin long lukautim yumi


yet long sait long sefti na tu ol arapela i kam bihain long yumi.

"Yu mas lukautim sefti bilong yu, na tu tingim sefti bilong arapela wan wok o famili memba bilong yu oltaim," Mista Hill i tok.

Mista Hill i tok olsem yumi olgeta i save wok wantaim kain kain ol birua i stap oltaim long sait long helt, sefti na envairomen. Olsem na yumi mas gat gutpela tingting oltaim long pasin bilong yumi long sait long sefti long wok ples bilong yumi.

Mista Hill i tok long sait long maining na prosening indastri sefti i mas stap namba wan samting tru long olgeta wok.

Em i salensim olgeta wokman meri long yusim dispela NMSW olsem sans long lainim nupela samting na tu kisim nupela aidia o tingting long bringim i go bek long wok ples na tu kisim i go long famili haus bilong yu.



Ol Mero na Gold i kamap sempion bilong sofbal resis



Steven Seri bilong tim Wewak i putim was long bal.



Pitsa bilong Wewak Juliet Seri i redi long tromai bal.

PNG i daunim SI long namba tu raun poroman resis

PAPUA Niugini (PNG) i daunim Solomon Ailan (SI) long namba tu raun poroman resis bilong ol man long futbol (soka) long las wiken na ol i bin kam bek log kantri long Mande.

Kepten bilong PNG Nesanel Futbol tim, Raymond Gunemba, i tok olsem namba tu raun poroman resis win bilong ol wantaim SI i kamapim histori.

"Dispela em i namba wan taim bilong PNG long daunim Solomon Ailan," Gunemba i tok.

"Mipela i win long namba tu raun resis bikos mipela i senisim sampela stail bilong mipela taim mipela i bin pilai namba wan gem."

Em i tok moa olsem, ol pilaia bilong Solomon Ailan i gat plant skil na stail bilong pilai, tasol kala bilong mipela i strongim banis gut tru long ol i painim net

long namba tu hap.

"Mipela i pilai strong wantaim pawa na spid bikos ol pilaia bilong mipela i harim tok bilong kosa bilong mipela na dispela i mekim mipela long win.

"Mipela i amamas long risal bikos dispela em i namba wan win bilong mipela long poroman resis na i redi long pilai long Nesens Kap long Pot Mosbi long Me, 2016.

"Mi olsem kepten mi tok olsem, i gat sampela asua i stap yet bilong mipela long senis na kamap namba wan tim long ol intenesenel poroman pilai bai kamap.

"Dispela i kamap histori bilong mi bikos mi go pas long tim long kamap namba wan taim wina bilong poroman resis na daunim ol SI long asples bilong ol," Gunemba i tok.

Trek sisen bilong PNG etlit long USA i stat

AUTDO Trek sisen bilong Papua Niugini Etlit i save stap long Yunaitet Stet ov Amerika (USA) i stat we planti etlit bilong PNG i soim sampela gutpela kala bilong ol pinis.

Foapela etlit bilong PNG i kisim ples wantaim ful skolasip long stadi long Yunivesiti long Texas.

Rellie Kaputin na Theo Pinau i stap long Wes Texas long Canyon taun long Amarillo. Heptetlit, Adrine Monagi, na hai jampa, Peniel Richard, i stap long Angelo Stet Yuni-

vesiti long San Angelo siti.

Sikspela etlit moa bai kisim skolasip we ol bai stat long Ogas long dispela yia.

Kaputin i mekim namba wan stat long sisen bilong em long Fonde wantaim 5.96 mita long jamp. Dispela em i sot long wan sentimita long nesanel rekot bilong em na nupela rekot long skul bilong em.

Monagi tu i mekim namba wan stat we em i bin klokim 14.66 seken long 100m resis. Em i bin skorim 4857 poin long namba wan

Philemon Tame i raitim

NESENEL Kapitela Distrik Mero na Pot Mosbi Gold i kamap sempion bilong namba 41 yia nesanel sofbal sempionsip resis bilong ol man na meri bihain long ol i daunim ol Pot Mosbi Kaks na Pot Mosbi White long gren fainel resis i bin kamap long Mande.

Long gren fainel resis bilong ol man, ol Mero i daunim ol Kaks wantaim 9-6 poin long Bisini pilai graun bihain long gren fainel resis bilong ol meri.

POM Kaks i stap pas wantaim 1-0 poin long namba wan hap bihain long wanpela ran we Bernard Toalbert i skorim.

Long namba tu hap, ol i skruim poin bilong ol i go antap long 2-0 poin bihain long Darius Kero i kisim wanpela poin.

Ol Mero i kisim ples bilong ol Kaks long namba tri hap taim Mero i skorim 3-pela ran. Tupela tim wantaim i

no kisim sampela poin inap ol i go long namba 4 ining.

Ol Mero i go insait wan-taim olgeta strong na pilaia bilong ol, Misiel Puipui, i soim olgeta stail bilong em long skorim 5-pela ran long namba 4 ining.

POM Kaks i no laikim ol Mero long kisim planti poin na ol i kisim tupela ran long wankain hap na stap klostu long ol Mero.

Ol Mero i stap pas, 8-4 poin, na ol i bin go insait long namba 5 na fainel ining. Taim las bet bilong ol i kamap, Puipui i kisim wanpela moa ran na bringim skoa i go antap long 9-4.

Ol Kaks i strongim ol yet na tupela pilaia bilong ol, Graham Kinavai na Demas Tovi, i bin kisim tupela ran, tasol ol i kam bihain wantaim 6 poin na Mero i kisim namba wan sofbal taitel bilong ol man.

POM Gold i daunim POM White wantaim 17-2 poin we banis bilong ol White i no strong tumas.

Dispela em i namba tri yia

win bilong ol long sempionsip resis bilong ol meri. Ol i bin win tupela taim pinis long yia 2014 na 2015 gren fainel, na ol i kamap wina gen long 2016.

Long namba wan taim bilong POM Gold long kisim namba wan bet, ol i kisim 6 ran long namba wan ining.

POM White i bekim long namba tu hap wantaim 2 ran we Eva Siriman na Matilda Moe i kisim.

Top skora bilong POM Gold, Tessa Karai i kisim 3-pela ran, Kate Uvia i kisim 3-pela ran na Florence i kisim 3-pela ran tu.

Ol i bin stopim pilai long namba 4 hap bikos ol i bihainim lo bilong gem.

Gren fainel bilong ol man i kamap namel long NCD Mero na POM Kaks we Mero i bin daunim ol POM Melonas 17-9 long sempionsip gren fainel bilong las yia.

POM Kaks i daunim Lae Reds wantaim 12-5 poin long kamapim POM gren fainel, tasol ol i lus.

Ipatas Kap i kolim ol fainel tim bai resis long nokaut



Isten End bilong Koka Kola Ipatas Kap (CCIC) i redi long ol fainel. Piksa i soim ol Ipatas Kap tim i resis long Murray Bareks.

BIHAIN long pinis bilong Koka-Kola Ipatas Kap (CCIC) resis long olgeta hap bilong kantri, menesmen i kolim ol fainel tim hisat bai resis long nokaut.

"Nau mipela i kolim ol fainel tim bai resis long nokaut em Olco Butterflies na Eastern End Spiders long Westen sait na Kamkumung Crushiers na Okapa Hawks long Isten sait," CEO bilong CCIC, Timothy Lepa, i tok.

"Mi CEO bilong dispela resis i kisim dispela taim na tok tenkyu long ol sponsa, tim, pilaia na ol stekholda long ol i go het na sapotim CCIC."

Lepa i tok tenkyu long petron bilong CCIC na Gavana bilong Enga, Sir Peter Ipatas, long em i bin kamap wantaim dispela tingting na i go het na sapot insait long 15 yia long dispela resis.

"Bikepla tenkyu long

Praim Minista bilong yumi, Peter O'Neill, long em i givim taim bilong em long sapotim dispela tingting. Mipela bai no inap long kamap long dispela mak, sapos yu i no givim sapot long dispela tingting," Lepa i tok.

Em i tok tenkyu tu long ol tim i pilai wantaim ol long dispela yia na em i lukluk long ol resis bai kamap long ol yia i kam.

resis bilong em na dispela em i namba tu bes rekot bilong em. Em i bin sot wantaim 162 poin long bungim 5019 poin em i bin kisim na i winim gol medal long Pasifik Gems.

Peniel Richard i bin winim 7.04 m long hai jam long namba wan resis bilong em we em i bin winim 3.1mita insait long wanpela seken.

Long wankain taim, Poro Gahekave na Shirley Vunatup i bin stat gut long 2016 ran-

ing sisen bilong Saut Plains Kolis long Texas.

Long namba tu indo resis bilong Vunatup, em i klokim 7.73 seken long 60m resis na 24.91 seken long 200m resis. Na tu, em i bin winim 400m insait long 57.52 seken long Sarere long Yunivesiti bilong Texas, El Paso.

Gahekave i winim 3000m insait long 10 minit na 52 seken.

OL etlit bilong PNG i stap long Texas bai bung long dispela wiken long wol Texas Rilei Mit long Austin.

Vipers i redi ...planti nupela pilaia i joinim Vipers

POT Mosbi Stop & Shop Vipers i redi pinis wantaim ol pilaia bilong em long Digicel Kap resis bilong dispela yia, tasol planti nupela pilaia i joinim ol.

Bipo faiv eit bilong Agmark Gurias na pilaia bilong Hunters, John Ragi Jr, i joinim ol Pot Mosbi Vipers long dispela yia. Em i joinim tupela brata bilong em, Sebulon na Quinton, long Digicel Kap sisen bilong dispela yia.

Long wankain taim, bipo pilaia bilong Sydney Roosters na Penrith Panthers, Wari Varage Jr tu i joinim ol Vipers aninit long 26 skwat man.

Sampela moa bilong nupela pilaia em Aaron Tokopae, husat i bipo pilaia

bilong Gulf Isapea, na wantaim George Supa, Mark Pitti, Manu Kame, Patrick Morea, Bobby Gore na Michael Yanis i joinim Vipers.

Ol trena na kosa bilong Vipers em Glenn Nami (kosa), Charlie Wabo (asisten kosa), Andrew Stone (trena), Geno Kimi na Philip Boge (asisten trena na Arua Ben Moide em i man bilong strongim ol pilaia.

Developmen skwat bilong Vipers em Dairi Kovae Junior (Porebada), Arova Manuma (AC Keleone), Nanai Manoka Ranu (Hiri), Joash Toringi (Hohola), Jerry Teme (Souths), Udia Ottio (Hawks) na Junior Onguglo (Tarangau).

Komboi i tok olsem 8-pela moa pilaia em ol bai makim long PRL, UPNGRFL, Sauts Setelmen na NCD Sabeben lig long skruim developmen skwat namba i go antap long 15.

“Ol dispela pilaia em ol bai kamap wanlain bilong ol pilaia bilong Vipers na ol bai trening tupela taim long wanpela wik wantaim ol fainel tim,” Komboi i tok.

Menesmen tim em William Busil Junior (bod seketeri/futbal menesa), Paul Komboi (operesen menesa), Paul Umba (asisten operesen menesa), Dokta Newton Albert (Sif medikol opisa), NA Dokta Peter Mefeae (pisioterapist).

- Fainel skwat bilong Vipers em;
- 1 Brendan Gotuno,
 - 2 Wari Varage Junior,
 - 3 John Ragi Junior,
 - 4 Nicko Dom,
 - 5 Michael Yanis,
 - 6 Sebulon Ragi,
 - 7 Tilix Kawage,
 - 8 Sam Koim,

- 9 George Supa,
- 10 Mark Pitti,
- 11 Steward Nomi,
- 12 Raymond Tia,
- 13 Bobby Mori,
- 14 Ham Tina,
- 15 Quinton Ragi,
- 16 Nickson Kolo,
- 17 Eliza Riyong,

- 18 Richard Kambo,
- 19 Dickson Nap,
- 20 Manu Kame,
- 21 Patrick Morea,
- 22 Bobby Gore,
- 23 Robert Nande,
- 24 Josiah Abavu,
- 25 Aaron Tokopae, na
- 26 Peter Paulus.



Piksa i soim ol Royals na Brothers i pilai long Nesenel Futbol Stediam long las wiken. Dispela tupela tim i bin go long gren fainel long las yia na ol Royals i bin daunim ol Brothers. Nau planti ol Vipers pilaia em ol i pikim long ol dispela klap resis insait long Pot Mosbi. Piksa: Ncky Bernard

Ol etlit i resis long go long Rio Gems

stori i kam long bek pes

Etlit husat i soim namba wan skil na kala bilong em bai ol i makim em aninit long IAAF skoa tebol bilong etletik na tu, ol bai bungim taim bilong PNG Olimpik Komiti i putim olsem Jun 19, 2016 long pinisim resis.

Skoa tebol em i ples kliia we ol bai lukluk long kala bilong wan wan resis na ol bai givim ol poin. Etlit husat i pinis long sotpela taim em ol bai givim moa poin.

Wanpela gutpela eksampel em bes taim bilong Stone long 200 mita resis long las yia em i 21.28 seken na poin bilong dispela em i 1027. Bes taim bilong Boino long las yia long 200 mita resis em 51.51 seken na em i kisim 1056 poin.

“Etlit husat i soim namba wan kala bilong dispela yia long stat bilong resis inap long Jun 19 bai kisim ples long resis long Rio,” Presiden bilong Etletik PNG, Tony Green, i tok.

“Luk olsem Nelsen na Mowen wantaim bai go resis long Rio.”

Boino i mekim gutpela stat long kempen bilong em wantaim 49.81 long winim 400 mita resis long wol indo sempionsip long Portland long Mas 19.

“Boino i bin pinisim long gutpela taim na dispela em i namba wan resis bilong em long dispela sempionsip, tasol em i save resis long 400 mita bipo.

“Indo 400 mita resis bilong Theo long dispela yia em 49.61 seken na em i wankain taim olsem bilong Boino.

“Ol i bin tok orait pinis long Boino long resis long 400 mita hadel long Texas Rilei Mit long Austin Texas long Fraide, Epril 1.

“Dispela em i stronpela fil na gutpela resis bilong Boino na em i lukluk long dispela resis,” Green i tok.

Green i tok moa olsem trening bilong Nelsen long dispela yia i no kamap orait. Bikos, em i bin kisim bagarap na i stap long marasen i asua long trening bilong em. Na tu, resis program bilong em i no go stret insait long Februeri na Mas na em i stat trening strong nau.

“Tingting bilong Stone i no orait bikos em bai no inap long resis long Australian Nesenel Sempionsip long dispela wiken bikos em i no winim mak bilong kwalifai long dispela sisen.

“Pinau bai gat rot long resis insait long oltaim program wantaim West Texas A&M Yunivesiti long Epril inap Me.

“Long wankain taim, tupela meri etlit, Toea Wisil na Donna Koniell, i resis yet long kisim ples long Rio Olimpik Gems, bihain long Sharon Kwarula na Betty Burua i lusim resis.

“Wisil i mekim gut yet na em i ran insait long mak bilong kamap kwalifai, tasol i luk olsem Donna Koniell i ken ran insait long kwalifai taim tu.

“Tupela etlit wantaim bai resis long Australian Nesenel sempionsip long Sydney long dispela wiken,” Green i tok.



Nelson Stone i resis wantaim Mowen Boino na Theo Pinau long kisim wanpela ples long go resis long Rio Olimpik Gems aninit long Etletik PNG. Em i kamap sempion tupela taim long 400 mita resis long Pasifik Gems. Long yia 2012, em i bin kamap maus man bilong Tim PNG na i go long London. Piksa i soim Stone i amamas long em i kamap namba wan long 400 mita resis long 2015 Pasifik Gems. Piksa: Wantok fail.

Linking our country

Reservations - Toll Free: **180 5465** email: sales.linkpng@airniugini.com.pg
Find us on Facebook: www.facebook.com/linkpng

LinkPNG f
A Subsidiary of Air Niugini

— Current routes
- - - Proposed routes
- Charter service

41 Nesenel Sofbal Sempionsip POM 2016



POM Tim 2 bilong ol man husat i winim taitel.



POM Tim 3.



Allan Seri bilong tim Wewak i redi long paitim bal.

Lukim stori long pes 25...

Rana bilong Pom 2 man i redi long kisim namba tu bes.



Bikpela bita bilong Pom tim 2 bilong ol meri i redi long paitim bal.



Pitsa bilong Pom man tim 3 i redi long tromoi bai.

Oi poto: Nicky Bernard



POM Tim 3 bilong ol meri



POM Tim 1 meri, husat ol Sempion bilong 2016



DIANA

Tuna

Niupela Swit Teist
Nau Igat Moa Oil!



PNG's ORIGINAL TUNA

PNG MADE  Manufactured by:
RD TUNA CANNERS LTD.

Ol etlit i resis long go long Rio Gems



OL etlit i resis long kisim wanpela ples ol i putim bilong Papua Niugini aninit long rul bilong Yunivesiti we ol man etlit i ken kisim ples long trek na fil etletik resis long Rio Olimpik Gems.

Etletik PNG i kisim nem bilong tripela etlit we ol i bin resis long dispela ples long las yia na ol i bin kamapim rot pinis bilong makim wanpela.

Ol etlit husat i resis em Mowen Boino- i bin resis 3-pela taim long Olimpik Gems na tu, em i bin kamap

sempion long 400 mita resis 4-pela taim long Pasifik Gems.

Nelson Stone i resis tu long dispela ples na em i kamap sempion tupela taim long 400 mita resis long Pasifik Gems. Long yia 2012, em i bin kamap maus man bilong Tim PNG na i go long London.

Na namba 3 man i resis em Theo Piniau, husat i namba wan etlit bilong 200 mita na 400 mita resis.

lukim moa long pes 26

Ol etlit husat i resis long kisim ples long Rio Gem em Mowen Boino, Nelsen Stone na Theo Piniau. Mowen em i bin resis 3-pela taim long Olimpik Gems na tu, em i bin kamap sempion long 400 mita resis 4-pela taim long Pasifik Gems. Theo Piniau em i namba wan etlit bilong 200 mita na 400 mita resis. Piksa i soim Theo i sanap long lep han na Mowen i sanap long rait han long West Texas A&M Yunivesiti.



Taim yu senisim nepi bilong bebi bilong yu
Senisim long Sensi

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg